

LUKUMU YA BANA ³

 . . . Neville. Mbote, dibuundu. Beto ke na kiese mingi na kuvutuka diaka samu na kupesa beno diaka mbote na Nkumbu ya muvimba ya kulunga ya Mfumu Yesu. Mu ke na kivuvu ti beno me lutisa lumingu mosi ya nene ya kufuluka na balukumu mpe balusakumunu ya Yandi.

² Ntangu mu me kuma awa na suka yayi, mu me kutana na mwana-bakala mosi kuna mpe yandi pesaka munu mwa plaque ya Wanzio mukebi yina vwandaka kengila bana zole ya fioti. Mpe mu zabaka ve ti ya vwandaka Daulton, mwana-bakala ya ba-Daulton.

³ Mpe awa na mwa basabala me luta, to mwa . . . Pene ya balumingu zole me luta, ya vwandaka na tata mosi, tata mosi ya Muklisto, salaka lombilu samu na mwana ya yandi ya kento ya ntwenia yina vwandaka ntete Muklisto ve, na yina yandi vwandaka ya kutelema na ndonga ya bisambu. Mpe Mpeve-Santu tubaka, “Mu—mu ke pesa nge mwana ya nge.” Mpe yandi yayi awa na suka yayi, ya me vuluka mpe ba me botika yandi na Nkumbu ya Mfumu Yesu, ya me vwandaka na estrade, kaka mutindu Mpeve-Santu tubaka. Mpe bana yankaka ke ya kuvwanda nziunga-nziunga. Mu zaba ti dibuta ya Daulton kele na kiese.

⁴ Beno me mona mama ya leke yina kuna ba me sambila samu na bébé ya yandi na Lumingu me luta, ba banzaka ti yandi ke kufwa. Mu ke mona ti ya ke kaka na beto na suka yayi, mpe beto ke na kiese mingi samu na yawu, mpangi-kento. Ba banzaka ti ya vwandaka na dystrophie musculaire, mpe ya vwandaka yawu ve. Na yawu beto ke vutula matondo mingi.

⁵ Beno me mona bankundi ya beto nionso ya mbote. Mu ke bambuka moyo muntu yayi awa kwisaka samu na kusolula na munu na kingenga na—na Chautauqua na ntangu mosi, mu ke kwikila. Mu vwandaka na madia ya suka na nge na kento ya nge na bana, mu ke kwikila yawu . . . to nge na kento ya nge, to bana, Yinga, mpe. [Mpangi-bakala mosi me tuba, “Middletown.”—Mu.] Middletown, na . . . Kasi beto nionso . . . Mu me zimbana nkumbu yango, na yawu mu ke bokila yawu kaka Chautauqua. Yinga, tata. Mingi ya bampangi ya munu ya babakala.

⁶ Mpangi Charlie Cox na Mpangi-kento Nellie awa, ya ke vwandaka yinzo ya zole samu na munu, mpe ya ke monana ti beno kele bana ya munu. Mu ke kwenda kuna, ya kele kuna mu ke lutisaka ntangu ya munu ya mingi samu na kulenga, kuna. Yandi kele muzombi ya kulutila mbote na Kentucky ntangu mu ke na Indiana. Mpe na yawu Indiana . . . Mpe Charlie, mu ke tuba na nge ti mu ke na ntima tiya-tiya, mu zola kwenda mpenza

kukwenda kuna samu na kukanga mwa ba-perche ya Amerique to ba-perche arc-en-ciel na ntwala ya kukwenda kuna. Mu ke mona kaka ti ya lendaka sala mpasi ve.

⁷ Mpangi Parnell . . . Par- . . . Arnett, ya Lou- . . . Caroline ya Sud. Mpe Mpangi-bakala . . . Mbote, ya ke na bantu ya mingi awa yina me katuka na bisika ya mutindu na mutindu, yina me kwisa na suka yayi samu na kutala beto.

⁸ Beno zaba, beno zaba ti beto ke na bandimi mingi awa ve. Beto ke kuzwaka kaka kubundana mosi na yankaka, ntangu Menga ya Yesu Klisto, Mwana ya Nzambi, ke sukula beto na masumu nionso ya nkú.

⁹ Ntangu yayi, beto ke vwanda na lesò mosi ya kitoko, ya ke kaka ya nkembo. Mpe beto kele, na kutala mu ke . . . zaba ti mu ke sepela na yawu, mpe mu zaba ti beno nionso ke sepela na yawu mpe. Mu ke bandaka na bantangu yankaka na kati ya kilumbu, na kuzonzila yawu to na kutanga yawu, mu ke baka banzila zole mpe mu ke kota na Masonuku mpe, kima ya ntete beno zaba, mu ke bakula ti mu me tanga kubanda Genèse tii na Apocalypse, mu ke landila na kukwenda.

¹⁰ Mpe, beno zaba, mu zola baka ntangu mosi samu beto lendaka—samu beto lendaka baka Buku ya—ya ba-Hebreux, mpe beto baka kaka . . . Mbote, ntangu nsungi ya kuzomba bampadi, mutindu Ngonda ya yivw- . . . pene ya Ngonda ya ku- . . . Ngonda ya nana, beno zaba, samu beto longuka yawu mbote-imbote tii kuna beto ke kwenda na bayinsi ya nzenza, konso nkokila samu na kulonguka Buku ya ba-Hebreux, to Buku ya Exode. Yinki mutindu Nzambi, Exode, ke na kubasisa bantu ya Yandi na Egypte, exode! Kifwani mosi ya kitoko na beto ntangu yayi ke na kukubama samu na exode ya beto. Ya ke, oh, ya ke kima mosi ya kulutila kitoko. Masonuku nionso ke vukana kintwadi, mpe ya ke Disolo mosi ya nene.

¹¹ Ntangu yayi, na suka yayi beto kele—beto kele kaka na Buku ya . . . Beto zolaka baka makapu tatu ya ntete ya—ya Buku ya ba-Ephésien. Mukanda ya Paul na ba-Ephésien na Ephèse, ya ke na kumeka, na kutula dibuundu na kisika ya yawu. Mpe kaka na ntwala beto belema na yawu, beto lenda baka ntangu mosi to zole samu na kusambilà, na ntwala beto banda.

¹² O Mfumu, Nzambi ya beto, beto me kwisa na Ntwala ya Nge na ntangu yayi, beto me lunga kaka ve, beto me zaba ti ya ke na Munkayulu ya Menga ke na kuvingga kuna, yina ke sukula beto na mvindu nionso, mpe yina ke talisa beto na ntwala ya Tata, ya kuvedila, mpe bantu yina ba lenda semba ve. Ya ke na kima mosi ve beto lenda sala samu na kuzwa yayi. Kasi samu ti Yesu me sala yayi samu na beto, na kukilumusa nionso beto ke kulumusa bayintu ya beto na Ntwala ya Yandi mpe Nkumbu ya Yandi, beto ke lomba ti Nge tinda Mpeve-Santu na suka yayi na kati ya beto. Mpe munu na kuvwandaka théologien ve to

na kuzabaka ve mutindu ya kutula Masonuku na ndonga, kasi mu me fuluka na nsayi mpe mu ke vutula matondo na kuwa Mpeve-Santu mutindu Ya ke tambula na kati ya munu, bika Ya sakumuna beto nionso kintwadi mutindu beto ke tanga Ndinga ya Nge ya kusonama, ti Yawu kuma Luzingu ya Kukonda nsuka samu na beto. Pesa yawu, Tata. Beto ke lomba yawu na Nkumbu ya Yesu mpe samu na Yesu. Amen.

¹³ Ntangu yayi mu lenda kutuba mutindu yayi, ntete, ti kana mu me tuba kima mosi yina lendaka vwanda mbote ve, yina ke ya kusungama ve, mbala yankaka ya kele yimbi mpenza landila malongi ya beno, to kima yina beno ke wisana na yawu ve, mu ke na kivuvu ti Mpeve-Santu, ti Yandi ke yidika na mutindu ya mbote mingi mpe na lembami tii kuna ya ke vwanda ve...ba ke kota nsoki na muntu mosi ve. Beno me mona? Ti ya—ya ke salama na zola mpe kubundana ya kimpangi, ti yawu yina ya ke... Ya ke salama mutindu yina.

¹⁴ Mpe nionso bandaka na dilongi ya Lumingu me luta, mu ke kwikila yawu yina, Lumingu me luta na suka, mutindu *Ntinu Me Losama*. Ya ke na muntu me baka dezia bande? Mu banza ba me baka yawu, mpe beno lenda baka yawu na beno me zola, *Ntima Me Losama*.

¹⁵ Ntangu yayi na mwa bilumbu fioti mpe beto ke banda na...kuna na Middletown, Ohio. Beto ke zola ti bayina nionso ke kuzwa konze ya bawu—ya bawu na ntangu yina na kukwisa kutana na beto kuna, samu beto ke na kuvingga na kulutisa bantangu ya mbote ya kubundana ya kimpangi na Middletown, Ohio. Docteur Sullivan yina kele mfumu, mu banza, ya comité. Mpe ya ke vwanda na bankokila tanu ya balukutakanu, mu ke longa mutindu mulongi ya nzenza na Convention Internationale ya dibuundi Interdenominationel. Na yawu—na yawu na manima ya yina, ya ke vwanda na lukutakanu ya beto mosi na manima ya yina. Beto me kubika yawu tii na kilumbu ya kumi na zole, kasi na ngwisani beto lenda kwenda na ntwala ata mpe lumingu mosi na manima ya yina, ya me tala kaka mutindu Mpeve-Santu ke twadisa beto. Beto nionso zola twadisama na Mpeve; yina Mpeve ke tuba na beto na kusala, na yawu beto zola sala yawu na nswalu nionso.

¹⁶ Mpe beto bambuka moyo ti na ntangu beto ke tumama na Mpeve, leso mosi ya nene beto zola longuka, ya ke kusala mambu nswalu-nswalu ata fioti ve. Beno me mona, beno baka ntangu ya beno, beno vwanda na lukwikilu. Kana beto me lomba kima mosi na Nzambi, beto bambuka moyo Nzambi ke pesaka mvutu na bisambu. Yandi ke salaka yawu na ntangu ya Yandi, na mutindu ya kulutila mbote, ya ke salaka ti yawu tambula mbote samu na beto. Mpe kana ya ke mutindu yina ve, na yawu yinki beto ke na kusala awa na suka yayi? Yinki—yinki ke sala beto na kutubaka ti beto kele Miklisto? Nzambi... Kana yayi ke Ndinga ya Nzambi

ve, na yawu Ya ke ya kieleka ve, na yawu beto kele bantu ya mawa mingi kulutila bantu nionso.

¹⁷ Mu ke na kiese mingi na kuvwanda na ntima mosi na bantu mingi awa yina zaba ti Yayi kele Ndinga ya Nzambi yina ke kubwaka ve. Na yawu Yayi, Yayi kele Ndinga ya Kieleka, konso Mpova ya Yawu, konso kitini ya Yawu. Mpe na lemvo ya Nzambi, mu kuzwaka ntangu ya mbote ya kumona Yinsi yina beto ke kwenda kilumbu mosi.

¹⁸ Mazono. Bantu kuzaba ve yina bantangu yayi ya kiadi ke kwisaka na yawu na kisalu ya mutindu yayi. Mu vwandaka na kiadi mingi, mpe mu tubaka na kento ya munu, “Mu zola kwenda.”

Yandi tubaka, “Samu na yinki nge ke tuba mutindu yina, Billy?”

Mu tubaka, “Oh, awa mu ke na matata mpe nionso yina.”

¹⁹ Na yawu ya monanaka ti Mpeve-Santu tubaka na munu ti, “Nge zola luta na lweka ya yawu? Nge zola, nge zola tina yawu?” Beno me mona?

²⁰ “Ve,” mu tubaka, “bika mu telema na ntwala ya yawu mpe kukutana na yawu. Beno me mona, kaka . . .” Beno me mona?

²¹ Ya ke mbote mingi. Na ntima ya muvimba, ya kieleka, mu ke tuba yayi samu mu me mona yawu munu mosi, ti kaka na manima ya luzingu yayi, beto kota na Yinsi yina me luta yina ba lendaka banza. Mpe kana ya ke na banzenza awa, mu banza ti beno kele ve . . . Mu ke sambila Nzambi ti beno baka munu ve mutindu fanatiki. Mu—mu zola, na zulu ya nionso, kuvwanda ya kuvedila mpe kutuba Kieleka. Mpe yinki mbote ya ke sala na munu na kutuba na beno diambu ya luvunu, na ntangu ya ke na mambu mingi—ya ke na mambu mingi ya Kieleka yina kele awa? Beto, samu na yinki beto fwana tuba diambu ya luvunu samu na yawu? Beno me mona? Ya, Ya ke kaka Kieleka.

²² Mpe, kuyituka ve, mu ke kwikila ti Paul ba nataka Paul na zulu ya tatu, mpe yandi monaka bima yina yandi vwandaka na mfumu ya kuzonzila yawu ve. Mpe kilumbu mosi yandi tubaka, “Ya ke mambu yina disu me monaka ve, dikutu me kuwaka ve, to yina me kotaka ve na ntima ya muntu, yina Nzambi yidikaka samu na bawu (na kibumbulu) yina ke zolaka Yandi.”

²³ Oh, Beto ke na kuzinga . . . Beto ke na kuzinga na kati ya mvindu awa, yimeni, kaka kisika ya mvindu ya kufuluka na—na mulinga ya mvindu. Ya . . . Ata ti ya ke sambukila beto ve, beto ke na kuzinga na kati ya yawu, mulinga yina ke basika na makala ke na kubasisa mulinga ya masumu. Mosi ya bima yina ke salaka munu mpasi na ntima na ntangu mu ke banza yawu, kele kisika ya ntama ya mvindu na ntangu ya ke kuzika. Beno me lutaka ntete pene-pene ya yawu? Ya ke pesa boma, nsunga yina ya mulinga ya nsambukila ke basika kuna na mvindu ya mutindu

na mutindu. Mpe—mpe kana beno pema nsunga ya yawu, mpe ya ke balula kivumu ya beno.

²⁴ Mu ke bambuka moyo ntangu mu zolaka kwenda na New Albany, kuna na . . . kuna na Dix-huitième Rue, kuna vwandaka kisika ya mvindu ya ntama, mpe ya lombaka ti mu kwenda kuna samu na kubaka bampaku mpe kutelemisa ba-compteur. Mpe mu vwandaka simba kaka nzila na mwini, nzila ya kumi na nana, na lweka yina kuna mu lendaka luta, samu ya vwandaka na nsunga ya yimbi mingi. Mpe kuna, ya vwandaka na banzutu ya bampuku mpe ya bayimbwa mpe bima yankaka, beno zaba, nionso yayi vwandaka basisa mulinga na mulinga yina vwandaka basika kuna.

²⁵ Ntangu yayi, na yina, tala mutindu luzingu yayi me fwanana na yawu, na mbote ya yawu nionso. Ya ke fuluka na mulinga, nsunga ya disumu ke na kuwakana bisika nionso, mutindu ya vwandaka, na nzonzolo ya kimpeve. Kasi, oh, kisika mupepe ke na kupepa na kimpwanza, mpe bima nionso kele kitoko mpe ngemba mpe kiese mpe Luzingu ya Kukonda nsuka, na simu yina ya nzadi. Kasi beto ke na bitumba, na yawu beto tandama kaka ve mpe kutuba “beto sala nswalu samu na kukuma kuna,” beto nata kintwadi na beto bayina nionso beto lenda nata. Yinga.

²⁶ Mpe ntangu yayi kikuma ya baleso yayi kele kukotisa bayina nionso me zabuka ntete na Yinsi. Kikuma ya yayi, kulonguka Buku yayi ya ba-Ephésien, kele kutula dibuundu kisika ya lendaka vwanda kati na Klisto. Ya ke kifwani ya Ngwisani ya Ntama mpe Buku ya Josué, kisika Josué kabisaka. Lumingu me luta beto monaka yawu, kisika Josué kabisaka ntoto na konso muntu. Mpe yandi salaka yawu na lutwadusu ya kimpeve.

²⁷ Wapi mutindu Moise vwandaka . . . basisaka bantu na Egypte, na ail, na poireau, kuna, mpe pesaka bawu kisika yina Nzambi silaka bamvula nkama yiya na manima . . . to bamvula nkama yiya na ntwala, ti Yandi ke nata bawu na kisika mosi, na yinsi ya kitoko wapi miliki na mafuta ya niosi vwandaka ya kufuluka. Mpe Moise twadisaka bana ya Israel tii na yinsi, kasi ya kotisaka bawu ve.

²⁸ Mpe Yesu, na kimpeve, na bantu yina ke . . . ba silaka beto Mpeve-Santu kubanda mbandukulu, Yesu twadisaka beto na nsilulu. Kasi Mpeve-Santu kwisaka, mutindu Josué, samu kufuluka mpe kutwadisa mpe kutambusa mpe kubaka yinsi, to kubaka dibuundu. Beto me mona, ya kieleka, na yina, ti na kati ya beto . . .

²⁹ Ntangu yayi awa, mbala yankaka, bantu lenda banza ti mu ke na mambu ya ngolo mpe mu ke meka na kukondwa luzitu na bampangi. Ya ke mutindu yina ve! Nzambi kuvwanda Zuzi ya munu, mu ke mutindu yina ve. Beno me mona? Mu ke na kumeka kaka na kutilisa kima yina kele Kieleka. Beno me mona? Beto ponaka bantwadisi, bantu, na kisika ya lutwadusu, bantwadisi,

lutwadusu ya Mpeve-Santu. Beto zolaka ti bantu kupesa beto kitini ya beto mpe kutwadisa beto, ba-denomination mutindu ba-Methodiste, ba-Baptiste, ba-Presbyterien, ba-Luthérien, Dibuundu ya Klisto, ba-Pentecotiste, mpe ba-denomination ya mutindu na mutindu, ti organisation kuvwanda mbandu ya beto, ti beto landa yawu. Kasi beto kele . . .

³⁰ Kisika mosi ve na kati ya Biblia ba me lomba beto na kusala kima ya mutindu yina. Ya ke na Masonuku ve, na kati ya Biblia nionso ya Nzambi, kisika Yandi salaka organisation na dibuundu to kisika Yandi me tubila organisation, ya ke na kisika mosi ve na kati ya Biblia. Kasi ya ke vwandaka kaka ya kuswaswana na yawu. Yandi zola ve ti beto fwanana mutindu bima ya yinza. Yandi zola ti beto vwanda ya kuswaswana, yina ba me tula na lweka.

³¹ Mu zola tuba ve ti kuvwanda “bazoba,” mutindu beto ke bokilaka yawu. Mu zola tuba ti bantu yina ba me bokila na kubasika, oh, yinsi ya santu ya kusakumuka, yina ke zinga baluzingu yina ba lenda semba ve, kusala, mpe kuzinga kaka mutindu mosi na Yandi, na ntangu ya ke sala na kati ya beto, samu beto kele nsalulu ya Yandi, yina me salama na Klisto Yesu samu na bisalu ya mbote.

³² Ntangu yayi, Kilumbu ya tatu na nkokila, mingi kati ya beno vwandaka awa ve na Kilumbu ya tatu na nkokila, kasi beto me mona . . . Mu ke kwikila ti ya ke nzila ya 3 to . . . Ve, ya ke nzila ya 5.

. . . samu na lukumu ya bana, to kutula bantu na kisika
ya bawu . . .

³³ Yinki mutindu Nzambi, kumeka kutula bantu ya Yandi na kisika ya bawu. Mpe ntangu Nzambi tula muntu mosi na kisika, na yawu, oh, dibuundu ya muvimba zola fwanana na muntu yina, kuvwanda na kima ya mutindu mosi, kusala bima ya mutindu mosi. Ba me yidikaka beto ya kuswaswana, ba me salaka beto ya kuswaswana, beto ke na bankadulu ya kuswaswana, mpe ba me tulaka beto na bisika ya kuswaswana, mosi na mosi na kisala ya kuswaswana; mbala yankaka mosi samu na kisalu ya fioti, yankaka samu na kisalu ya nene. Mu ke kwikila ti ya vwandaka David to mosi ya baprofete, mu me zimbana ntangu yayi, yina tubaka, “Mu zola vwanda payaso na Yinzo ya Mfumu, na kisika kuvwanda . . . kuzinga na kati ya batenta na bantu ya . . . bantu ya nkú.”

³⁴ Ntangu yayi beto ke telema kaka sekonde mosi na zulu ya lukumu ya bana, nzila ya 5, samu beto ke meka na kulandila kukwenda na ntwala na mutindu beto lenda sala yawu. Kasi ntangu yayi beno bambuka moyo yintu ya dilongi, nionso ke zonzila kaka kutula na kisika mosi. Bantu yikwa ke na kubakula yawu? Mu zola kuwa beno kutuba yawu na mpova mosi: “Kutula na kisika mosi Nzutu ya Yesu Klisto na kisika ya yawu kati na

Klisto kisika Mpeve-Santu ke twadisa beto.” Yawu yina, ntangu yayi beto me kuzwa yawu, beno me mona. Kutula beto na kisika ya beto, yawu yina Buku ya ba-Ephésien ke sala.

³⁵ Mpe beno tala mulongisi yayi ya nene, Paul. Kima ya ntete yandi salaka kele kubasisa na nganda mabanza nionso ya kubwa. Ya kubasisa mabanza nionso ya “kuvwanda Muklisto bubu yayi mpe mbasi mu me kwenda, mpe kilumbu yina ke landa Nzambi ke fundisa munu mpe kilumbu yina ke landa mu ke vutuka diaka.” Yina ke na mfunu ve! Ntangu yayi ya ke... Buku yayi ke talisa ve na malongi ya kupanza nsangu, malongi ya ba-evangéliste. Beto kele ve... Mu ke zonzilaka mambu yina ve ntangu mu ke bisika ya kupanza nsangu. Mu ke longaka yayi na dibuundi, samu Paul zonzaka yawu na basantu, bayina ba me bokila mpe ba me keba, mpe bayina ba me fulusa mpe ba me tula na lweka, mpe bayina kele kati na Mpeve-Santu, ba ke dezia na Yinsi ya Canaan. Yandi ke na kumeka na kutuba na bawu, kima ya ntete, beno basisa na mabanza ya kutuba ti beno ke zimbana mpe beno ke sala *yayi*,, mpe beno ke na boma ya *yayi*. Beno vwanda na boma ya kima mosi ve, samu yandi ke na kumeka na kutuba na beno kisika beno kele, banani beno kele, wapi kele kisika ya beno.

³⁶ Ntangu yayi, beno lenda sala mambu ya yimbi, mpe ntangu nionso beno ke sala mambu ya yimbi beno ke futa samu na yawu. Yinga, tata, beno ke buka yina beno me kuna! Kasi yina me tala ata fioti ve mpulusu ya beno. Ntangu beno me butuka na Mpeve ya Nzambi, beno ke na Luzingu ya Kukonda nsuka mpe beno lenda kufwa ve mutindu mosi Nzambi lenda kufwa ve. Beno ke kitini ya Nzambi, beno kele mwana ya Nzambi.

³⁷ Mu butukaka Branham. Beno lenda pesa na munu nkumbu yankaka, nkumbu yankaka, kasi yina ke pekisa munu ve ti, mu kuvwanda kaka Branham. Mu butukaka Branham, mu ke vwanda ntangu nionso Branham. Mu ke... Ya lenda salama ti kilumbu mosi kizizi ya munu kubeba, yawu kubeba na arthrite, ti mu kutana na kisumbula ya tomabilu mpe mu zengana bitini-bitini ti mu fwanana na niama mosi, kasi mu ke vwanda kaka Branham! Samu na yinki? Menga ya Branham kele na kati.

³⁸ Yawu yina beno kele. Mpe ntangu Nzambi salaka beno... Ntangu yayi beno bambuka moyo, mu ke na kuzonza ve na bantu yina kele na nganda ya Klisto. Mu ke na kuzonza na bantu yina kele kati na Klisto. Yinki mutindu beno ke kotaka kati na Klisto? “Na Mpeve mosi!” M ya nene p-e-v-... yina zola tuba, “Na Mpeve-Santu mosi beto me botama kana na Nzutu mosi.” Yinki mutindu beto ke... Yinki mutindu beno ke kotaka? Na mbotika ya masa? Mu ke wisana na beno ve ba-Baptiste mpe beno Dibuundi ya Klisto. Na mbotika ya masa ve, ata fioti ve! Ya Ntete ya Corinthiens 12, ke tuba, “Na Mpeve mosi, Mpeve-Santu, beto me kota na Nzutu yina.” Mpe beno me kebama mutindu Nzutu yina kele ya kukebama. Nzambi me... silaka yawu.

³⁹ Yinki mutindu Nzambi lendaka sambisa Yandi diaka, na ntangu Yandi kwendaka na Calvaire? Yandi mataka na Golgotha, ba bulaka Yandi, ba lwadisaka Yandi, Yandi lendaka belusa ve, Yandi lendaka tuba ata mpova mosi ve, na mutindu nionso. Samu na yinki? Yandi vwandaka na masumu ya yinza na zulu ya Yandi. Ya kele ve ti Yandi vwandaka nsumuki, kasi “Yandi kumaka disumu” samu na munu na beno. Masumu nionso ya yinza kubanda Adam tii na kwizulu ya Yandi, yawu kele na zulu ya dipeka ya Yandi. Mpe Nzambi vwandaka pesa ndola na Mwana ya Yandi ve. Yandi vwandaka pesa ndola na disumu. Beno me mona mutindu ya vwandaka pesa boma? Yandi vwandaka katula masumu. Yandi vwandaka sala nzila ya kubumbama samu na bantu yina nionso Nzambi, na nzila ya luzabu ya Yandi ya mantwala, zabaka ti ba ke kwisa. Beto ke zonzila yawu na mwa minuti fioti.

⁴⁰ Ntangu yayi, na yina, ntangu beno kele “na Mpeve mosi beto me botama kati na Nzutu yina, Nzutu mosi, yina kele Klisto,” mpe beto me kebama seko.

⁴¹ Ntangu yayi, ya ke kisika ya zola sala kima mosi ya ngitukulu, mingi-mingi na bakwikidi ya ba-Arminien, ti ba ke...ba fwana sala kima mosi samu na makuki ya bawu, to kima mosi ya makuki. Yinki mutindu ya lenda vwanda na nzila ya bima zole na mbala mosi? To ya ke na nzila ya lemvo to na nzila ya bisalu, mosi. Ya lenda vwanda ve na nzila ya kima mosi, ya ke bima zole ya kuswaswana; ya fwana vwanda na nzila ya mosi. Ya ke...

⁴² Munu, oh, mu lenda mona kima yankaka ve kasi lemvo ya Nzambi. Mu kele ya kusala mutindu yina. Mu ke kwikilaka ntangu nionso na lemvo. Ya ke kaka lemvo samu na munu na mutindu nionso, yimeni. Ya ke munu—munu ve...ata mpe luzingu ya munu, ntangu mu vwandaka mwana ya fioti, mu lendaka mona kima yankaka ve, kasi kaka lemvo, lemvo. Ba ke tubaka, “Mu—mu ke...Kwanza munu mpe munu ke kwanza nge.” Mbote, ya ke nzonzolo mosi ya boma. Kasi mu ke kipe ve ata ti beno me kwanza munu to ve, kana beno ke na nsatu ti mu kwanza beno, mu ke kwanza beno na mutindu nionso. Beno me mona, lemvo. Yinga, tata. Beno me mona, lemvo ke salaka na nzila ya zola. Kana beno ke na nsatu ya yawu! Mu ke kipe ve ti beno me sala kima mosi ve samu na munu, mu—mu ke sala na mfunu ya yawu ve, kana beno ke nsatu ya yawu mu ke sala yawu kaka. Lemvo! Samu beno ke na nsatu ya yawu!

⁴³ Mu vwandaka na nsatu ya mpulusu. Kima mosi ve lendaka vulusa munu. Ya vwandaka na kima mosi ve ti mu zolaka sala samu na munu mosi, mu lendaka kukivulusa ve munu mosi. Kasi mu vwandaka na nsatu ya mpulusu, samu mu ke kwikilaka na Nzambi. Mpe Nzambi tindaka Mwana ya Yandi, na nzutu ya kufwanana na disumu, samu na kumona mpasi na kisika ya munu, mpe mu vulukaka, kaka na nzila ya lemvo ti mu vulukaka.

Ya vwandaka na kima mosi ve mu zolaka sala, to beno kusala, samu na kukivulusa beno mosi. Mpe bayina Yandi zabaka na mantwala na ntwala ya mbandukulu ya yinza . . .

⁴⁴ Beto zonzilaka yawu, Kilumbu ya tatu me luta. Beto talisaka Nzambi vwandaka na Elah ya Yandi, Elohim, mpe beto talisaka ti Yandi vwandaka zinga na yandi mosi. Kasi na kati ya Yandi vwandaka Butata, na kati ya Yandi vwandaka makuki ya mutindu na mutindu, mumbandu Mvulusi, mumbandu Munganga. Nionso yina vwandaka na kati ya Nzambi, mpe Nzambi vwandaka zinga na yandi mosi. Kasi na mutindu Yandi vwandaka Mvulusi, Yandi vwandaka Ta- . . . Yandi vwandaka na Wanzio ve, Yandi vwandaka na kima mosi ve. Ya vwandaka na kima mosi ve kasi Yandi mosi. Yandi vwandaka zinga yandi mosi. Kima mosi ve vwandaka zinga kasi Nzambi kaka.

⁴⁵ Kasi na mutindu Yandi vwandaka Nzambi, na yina ya fwana vwanda na kima mosi samu na kusambila Yandi, samu Yandi zola sambilu. Mpe Luzingu ya Yandi Mosi vangaka bivangu samu na kusambila Yandi. Ntangu yayi, na mwa ntangu fioti, beto vutukila yawu fioti, na mwa ntangu fioti ntangu yayi, beto ke vutukila yawu nionso ve, kasi beno ke kuzwa yawu na bande. Kasi na yina samu ti Yandi vwandaka Nzambi, Yandi salaka Bawanzio, mpe Bawanzio sambilaka Yandi. Bawanzio ke sambilaka Yandi kaka. Mpamba ve, Bawanzio yina ke telemaka na Mvwandulu ya Nzambi ke na mapapu sambanu, na balweka nyonso zole, mapapu sambanu. Ba ke na zole samu na kubumba kizizi ya Bawu, zole samu na kubumba makulu ya Bawu, mpe zole samu na kupumbuka, na Mvwandulu ya Yandi, ba ke boka na mwini mpe na mpimpa, "Santu, santu, santu, Mfumu Nzambi ya Ngolo nionso." Masonuku me tuba mutindu yina. Ba ke sambilaka Yandi, ntangu yayi kima mosi salamaka samu na kusambila Yandi.

⁴⁶ Na yina na kati ya Yandi vwandaka kisalu ya Mvulusi. Yinki mutindu mosi ya Bivangu yina, ntangu disumu vwandaka ve to ata dibanza mosi ve ya disumu, yinki mutindu mosi ya Bawu lendaka zimbana? Ya lenda salama ve. Na yawu ya fwana vwanda na kima mosi yina lendaka zimbana, na mutindu ti Yandi lendaka vwanda Mvulusi. Na kati ya Yandi vwandaka Munganga. Beno ke kwikila ti Yandi kele Mvulusi? Beno ke kwikila ti Yandi kele Munganga? Kasi yinki zolaka salama kana ya vwandaka na kima mosi ve samu na kuvulusa to kubelusa? Beno me mona, ya lombaka ti kima mosi kusalama mutindu yina.

⁴⁷ Na yawu, Yandi salaka yawu mutindu yina ata fioti ve, kasi Yandi tulaka muntu na kimpwanza ya kusoola yina ya me zola, "Kana nge baka *yayi* nge ke zinga, kana nge baka *yina* nge ke kufwa." Mpe muntu nionso yina me kwisa na yinza kele kaka na nsodolo ya mutindu mosi. Nzambi, na Luzabu ya Yandi ya mantwala, zabaka yina lendaka mpe yina lendaka ve. Kana Nzambi kele . . .

⁴⁸ Ba me yufulaka munu kiuvu mosi mazono, na théologien mosi, yina vwandaka na balukutakanu to yina kuwaka bande, yandi tubaka, “Mu ke na kiuvu mosi!” Yandi tubaka, “Na yawu Nzambi kele bisika nionso? Na yawu,” yandi tubaka, “Yandi lenda vwanda bisika nionso?”

⁴⁹ Mu tubaka, “Yandi kele bisika nionso ve na mutindu mpova yayi me bisika nionso me tuba yawu. Yandi lenda vwanda ve Kukala na manima kuvwanda yina ke bisika nionso. Kana Yandi kele bisika nionso samu na yinki beno ke sambilaka samu na kuzwa Mpeve-Santu? Kana Yandi kele bisika nionso, Yandi ke fulusaka mpwasa nionso, konso nsongi, konso cellule, konso fibre, mpe nionso yankaka.” Mu tubaka, “Samu na yinki Yandi sosaka Moise, kana Yandi kele bisika nionso, na nsuka? Samu na yinki Yandi balukaka na disamba ya muvimba ya Eden, na kubokaka, ‘Adam, Adam, wapi nge kele?’ kana Yandi ke bisika nionso?”

⁵⁰ Yandi kele bisika nionso samu Yandi zaba nionso. Yandi zaba nionso samu Yandi kele ya seko, na kuvwandaka ya seko ke sala Yandi kuvwandaka bisika nyonso. Na kuvwandaka bisika nyonso, na yina, na kuvwandaka ya seko, na yina, Yandi kele na Mazulu. Yandi ke zingaka na kisika mosi samu ti Yandi kele Moyo.

⁵¹ Kasi, na kuvwandaka ya seko, na yina Yandi zaba mambu nionso. Yandi zaba na ntangu nzinzi ke bweta disu ya yandi. Yandi zaba niosi ke salaka makelele, kisika ya ke kwenda na rayon samu na kusosa mafuta ya yandi ya niosi. Yandi zaba moineau nionso yina kele na zulu ya yinti. Yandi zaba mabanza yina nionso kele na butonfo ya beno, samu Yandi kele ya seko mpe Yandi zaba nionso. Ya zola tuba ti, Yandi ke kaka ve ti Yandi kele ya seko, Yandi zaba nionso, Yandi zaba mambu nionso. Kasi Yandi kele Moyo, Nzambi kele Moyo, mpe na Moyo yina bima bandaka na kubasika.

⁵² Mpe disumu, mu tubaka na nkokila yina, disumu kele kivangu ve. Kima mosi ve salamaka kasi kaka yina kele ya kulunga. Nzambi salaka mbote bima nionso. Disumu ke kivangu ve. Yandi tubaka, “Mbote, yina ke kivangu ya kieleka ya disumu.” Beno me kuwaka yawu. Kasi yina ke kifu. Disumu... Ya kele kaka na Kiyidiki mosi, ya kele Nzambi. Nzambi lendaka vanga disumu ve, samu Yandi kele ya santu mpe ya ke na kima mosi ve na kati ya Yandi samu na kusala yawu. Disumu kele kubeba; kivangu ve, kasi ya ke kubeba. Bizumba kele diambu ya mbote yina ba me bebisa. Luvunu kele kieleka ba me tuba na mutindu ya yimbi. Konso disumu, konso disumu kele mbote yina ba me bebisa.

⁵³ Na yina ntangu yayi, Nzambi yandi yina. Yandi me kukitalisa dezia Yandi mosi, Yandi kele Nzambi. Yandi me kukitalisa Yandi mosi mutindu Mvulusi, bantu vwandaka me zimbana mpe Yandi vulusaka bawu. Yandi me kukitalisa dezia

Yandi mosi mutindu Munganga. Ya ke sala luswaswanu mosi ve yina bantu ke tuba Yandi kele; mpe Yandi kele, na mutindu nionso, kaka mutindu mosi. Yandi kele Munganga, Yandi kele Mvulusi, Yandi kele Nzambi, Yandi kele ya Seko. Mpe Yandi kele na kikuma mosi. Mpe kikuma ya Yandi vwandaka, na mbandukulu, kusala bivangu yina lendaka zola Yandi mpe lendaka sambila Yandi.

⁵⁴ Mpe Yandi salaka bivangu, mpe bivangu kubwaka. Na yina Nzambi, na mutindu Yandi kele ya seko, talaka nzietelo nionso ya ntangu mpe monaka bantu yina nionso lendaka vuluka. Bantu nionso, Yandi zabaka yawu na nzila ya luza...na nzila ya luzabu ya mantwala. Na yina kana Yandi, na nzila ya luzabu ya mantwala, zabaka yina lendaka vuluka mpe yina lendaka vuluka ve, Yandi lendaka kubika na ntwala. Na yawu, mpova yango kele yimbi ve na mutindu nionso, mutindu yina ve? Yandi lendaka kubika na ntwala, samu Yandi zabaka yina lendaka mpe yina lendaka ve. Na yina, samu na kukanga bayina lendaka vuluka, Yandi fwanaka sala dikabu mosi samu na kukatula masumu ya bawu. Oh, kana beto lenda, beto lenda mona yawu, kaka mwa banzila fioti kuna. Yandi kukubikaka beto na ntwala samu na Luzingu ya Kukonda nsuka, na kuzabaka ti ya ke vwanda na bayina ke yambula mambu nionso, mpe ata ti bana ya yinza yayi ke kipe ve diambu yango, ya lendaka tuba kima mosi ve samu na bawu, samu ba vwandaka bana ya Nzambi. Mpe Yandi bokilaka bawu.

⁵⁵ Mpe Yandi tindaka Yesu, ti Menga ya Yandi kuvwanda mulemvo ya masumu, Menga ya mulemvo ya masumu, samu na kusala mutindu munkayulu, to kundimama, to kukatula mvindu. Ndandani ya kukatula mvindu yina ntangu nionso... Ata mbala mosi ve na lukutakanu ya reveal, kasi "ya ke zinga kaka, samu na kusambidila," yina ke sala ti Muklisto kuvwanda kukondwa mvindu na mwini mpe na mpimpa. Ya ke na Menga ya Yesu Klisto yina ke sala ti beto kundimama kuna na kulunsi, na...na Mvwandulu ya Nzambi, ya ke sukula beto ntangu nionso, na mwini mpe na mpimpa, na masumu nionso. Mpe beto kele ya kukebama mbote-mbote. Ya kukebama yinki mutindu? Na Mpeve-Santu, kati na Nzutu ya Mfumu Yesu, mpe ya kukebama. "Yandi yina ke kuwa Bandinga ya Munu mpe ke kwikila na Yandi yina tindaka Munu, yandi ke na Luzingu ya kukonda nsuka mpe yandi ke kwisa na lusambusu ve, kasi yandi me luta na lufwa tii na Luzingu." Ya ke sambisama ve! Muklisto ke kwenda na lusambusu ata fioti ve. Klisto kwendaka na kisika ya yandi. Muzonzi ya munu bakaka kisika ya munu. Yandi zonzilaka diambu ya munu, ti mu zabaka kima ve. Yandi tubaka na Tata ti mu vwandaka ya kulunga ve, ti mu zabaka kima ve. Kasi Yandi zolaka munu mpe Yandi bakaka kisika ya munu, mpe zonzilaka diambu ya munu, mpe bubu yayi mu ke na kimpwanza! Yinga, tata. Mpe Yandi basisaka Menga ya Yandi

kuna, mutindu dikabu samu na beto.

⁵⁶ Beno bambuka moyo Kilumbu ya tatu me luta na nkokila, Muklisto ve... Muklisto ke sumukaka, kasi nsumuki lenda sumuka ve. Nsumuki ke sumukaka ve, samu yandi kele nsumuki. Yandi ke kaka nsumuki na kubanda, mpe yimeni. Beno tala, beto baka mukongo ya buku yayi, ya ke ndombe, wapi kisika ya ke ndombe? Ya ke nionso ndombe. Ya ke na kitini ya mpembe ve, ya ke ndombe. Beno ke tuba, "Kitini *Yayi*." Ve, kele ve, nionso kele ndombe. Ya kele nionso ndombe. Nsumuki kele mutindu yina. Yandi me fundisama na kubanda. Mbote, beno ke tuba, "Yinki ke salama kana yandi sala bizumba? Yinki ke salama kana yandi baka na ngolo kento mosi? Yinki ke salama kana yandi—yinki ke salama kana yandi sala bansaka ya mbongo? Yinki ke salama kana yandi kufwa muntu?" Yina me tala beto ve. Yina me tala beto ve, beto ke na misiku na yinsi ya beto samu na kutala diambu yina. Beto kele ba-reformateur ve, beto ke balongi ya Nsangu ya mbote. Beto ke fundisa yandi ve samu na yina yandi me sala, beto ke fundisa yandi ve samu yandi me sala bizumba. Beto ke fundisa yandi samu yandi kele nsumuki! Kana yandi kele Muklisto, yandi lendaka sala yawu ve. Ya kieleka. Kana yandi me soba, yandi ke sala yawu ve. Kasi samu yandi kele nsumuki, yawu yina ke sala ti yandi sala mutindu yina.

⁵⁷ Ya ke kisika yina bantu ya misiku ke zimbisaka dikunzi ya bawu. Yinga, tata. Mpangi-bakala, bika mu tuba na beno, "Ya ke na bisalu ve, kasi na lemvo beto me vuluka, mpe yina na lukwikelu." Yinga, tata. Ntangu yayi, mu ke fundisa ve bampangi yina kele bantu ya misiku. Mpe ba ke vwanda kuna mutindu bayankaka nionso ke vwanda kuna, samu Nzambi kukubikaka Dibuundu ya Yandi samu na kuvwanda kuna. Kasi diambu kele ti, beno—beno ke pasula bantima ya bantu mingi, na mutindu ti ba ke zaba ve. "Bubu yayi, mbote, mbala yankaka kana mu—mu..." Bika bawu zaba; ti na ntangu nionso ba ke na nsatu ya yinza, ba ke kuna ve na kubanda.

⁵⁸ Kana mu ke ya kwikama na kento ya munu ya kele ve ti mu ke banza ti ya lendaka kufwa makwela na munu. Mu ke ya kwikama na kento ya munu samu mu ke zolaka yandi. Ya ke lukanu ya mbote beto me bakaka, samu beto ke zolanaka. Ntete, na ntwala ya salama, ya fwana vwanda na zola. Mu ke zolaka yandi. Ata ti mu ke kwikilaka ti kana mu me sala diambu ya yimbi yandi ke lemvakila munu, kasi mu ke sala yawu ve na mutindu nionso. Mu ke zolaka yandi.

⁵⁹ Ya ke mutindu yina na Klisto. Kana mu—kana mu ke zinga... Mu ke na bamvula makumi tanu, kana mu ke zinga tii na bamvula makumi yivwa to nkama mosi, ti mu me bikala diaka na bamvula makumi tanu; ti mu ke longa diaka ve, mpe mu ke vwanda na lweka ya nzadi, mu me vulukaka na mutindu nionso. Nzambi vulusaka munu na lemvo ya Yandi, mu ke na makuki ve ya kusala kima mosi ve, mu salaka, to kima mosi ve. Mu ke

longaka samu mu ke zolaka Yandi mpe mu ke zolaka bantu ya Yandi. Mpe kikuma yawu yina mu zaba ti mu me lutaka na lufwa tii na Luzingu, samu ti mu ke zolaka bawu mpe mu ke kwendaka sosa bawu. Mu ke kipe ve mutindu bawu kele, mu ke kwenda sosa bawu kaka. Beno kwenda sosa bawu, beno kwisa na bawu kaka. Kana balungi me wisana na munu ve mpe bayankaka me wisana na munu ve, mpe ba-denomination me wisana na munu ve, ya ke lembisa munu ve. Ya ke na kima mosi! Ya ke lembisa Yandi ve! Yandi kwisaka na kati ya kukondwa lukwikilu, mpe yina lembisaka Yandi ve, Yandi kwendaka kaka na ntwala na mutindu nionso. Yawu yina beto ke sala, beto ke kwenda kusosa bawu, beto ke kanga bawu na mutindu nionso. Na mutindu nionso, beno tanda diboko, beno simba bawu, beno kangama na bawu na mutindu nionso. Beno zaba nani bawu kele. Beno vulusa bawu. Beno ke sala yawu samu na zola. Ya kele ve samu ti “Mu fwana sala yawu,” kasi samu mu ke zola, samu beno ke zola.

⁶⁰ Beno ke tuba, “Mu ke sungika diambu yina na kento yina, kasi, mu ke tuba na beno ntangu yayi, mu banza ti samu mu ke kwendaka na yinzo-Nzambi mu lenda kwenda sungika yawu.” Ve, nge lenda kukisungika nge mosi, ntete. Beno me mona? Beno me mona? Kana beno ke na zola ya Nzambi ve na kati ya ntima ya beno, kima mosi ke sala ti beno zaba ti beno kele mbote ve, na yina beno ke kwenda—na yina beno ke kwenda sungika yawu na Nzambi. Na yina beno ke sungika yawu na nkalani ya beno.

⁶¹ Yesu longaka diambu ya mutindu mosi. Yandi tubaka, “Kana nge kwisa na diziku, mpe ya ke... ti nge bambuka moyo nge ke na kima mosi ke tambula mbote ve na nkalani ya nge to mpangi ya nge, kwenda sungika yawu na yandi, ntete.”

⁶² Ntangu yayi, ntangu yayi na bambandu ke kwisa. Beto monaka na Kilumbu ya tatu na nkokila, “bakutalisama.” Beto ke zonzila yawu diaka na suka yayi, “bakutalisama ya bana ya Nzambi.” Na nzonzolo yankaka, Nzambi ke na kuvingga. Na manima na ntangu ya nsuka ntangu beto nionso ke telema na ntwala ya Yandi. Bawanzio kuzimbanaka ve. Bawu zaba ve yinki mutindu kusepela na masakumunu mutindu beto ke sala yawu, bawu zimbanaka ata fioti ve. Kasi mu zaba kisika mu me katuka, mu zaba wapi ditadi yina ba me pampa munu, nsumuki. Beno zaba kisika ba me pampa beno. Ntangu yayi ntangu ba me kuzwa beto, na yina beto lenda telema na ntwala ya Nzambi, Oh, yinki kilumbu ya ke vwanda!

⁶³ Na yawu kukumu ya bana, kisika ya bana. Ntangu yayi, Nzambi ke na kusala yawu. Mpe ntangu yayi mu lenda talisa na beno yayi, na yina beto ke banda ntangu yayi na nzila ya 5, mu zola tanga Yawu.

*Yandi zabaka beto samu na lukumu ya bana na nzila
ya Yesu Klisto, kulandila mambote ya luzolo ya Yandi*

Mosi,

⁶⁴ Nzambi ke sepela na kusala luzolo ya Yandi, na lukumu ya bana, na kutula bana na kisika ya bawu. Ntangu yayi yinki Yandi ke na kusala? Yandi ke na kutula Dibuundu ya Yandi na kisika ya yawu. Ntete, Yandi bokilaka dibuundu ya Yandi, ba-Methodiste, ba-Presbyterien, ba-Luthérien, ba-Baptiste, ya ke na kubokila bawu. Na yina yinki Yandi salaka? Yandi tindaka Mpeve-Santu mpe pesaka bawu mbotika ya Mpeve-Santu.

⁶⁵ Mu zola ti beno ba-Pentecotiste kubasisa yawu na bantima ya beno. Pantekote kele denomination ve; pantekote kele nzingilu. Ya ke Mpeve-Santu. Ya ke organisation ve. Beno lenda sala organisation na Mpeve-Santu ve. Yandi ke sepela na yawu ve. Ntangu yayi beno ke na organisation yina beno ke bokilaka mutindu yina, kasi Mpeve-Santu ke basika mpe ke bika beno kuna, mpe ke landila kaka na kukwenda na ntuala. Beno me mona? Pantekote kele organisation ve; pantekote kele nzingilu.

⁶⁶ Na yawu Nzambi pesaka na bana ya Yandi Lubutuku ya malu-malu, na nzila ya Mpeve-Santu. Bawu kwisaka pene-pene ya Yawu na ntangu ba me sukula bawu, na ba-nazaréen, ba-Pelerin de la Sainteté. Na manima bawu salaka nzingilu ya pantekote, to mbotika ya Mpeve-Santu, kuvutuka ya makabu. Bawu kwendaka kuna ke tuba na bandinga ya malu-malu mpe ke tendula bandinga, mpe pesaka makabu ya kubeluka ya nzutu mpe bimangu, mpe bidimbu mpe mambu ya ngitukulu bandaka na kulanda bawu. Ntangu yayi ba kele bana, ba ke bana ya Nzambi. Ba me baka kisika kati na Klisto. Ba me kuma bana na nzila ya Lubutuku. Mpe Lubutuku ya malu-malu mpe kubalula ntima Yawu mosi kele Mpeve-Santu.

⁶⁷ Beno me balula ntete ntima ve tii kuna beno ke kuzwa Mpeve-Santu. Masonuku me tuba mutindu yina. Yesu tubaka na Pierre, beno yufula konso muntu yina, beno tanga Masonuku ya beno, ba nungisaka yandi ntangu yandi kwikilaka na Mfumu Yesu, yandi kumaka kilandi, ntumwa. Yesu pesaka yandi bafungula ya Kimfumu. Mpe Jean 17:17, Yandi santisaka bawu, pesaka bawu ngolo, tindaka bawu, samu na kubasisa bampeve ya yimbi mpe bima yankaka, santisaka bawu. “Santisa bawu, Tata, na nzila ya Kieleka ya Nge. Ndinga ya nge kele Kieleka. Mu ke kukisantisa Munu mosi samu na bawu.”

⁶⁸ Yina ke mosi ya bandinga ya kulutila kitoko yina mu me kuwaka ntete ve. “Tata, Mu ke kukisantisa Munu mosi samu na bawu.” Beno zaba ti Yandi vwandaka na muswa ya kuvwanda na dibuta? Yandi vwandaka muntu. Nge zaba samu na yinki Yandi vwandaka na muswa ya kuvwanda na kento? Yandi vwandaka Muntu. Yandi vwandaka na muswa ya bima nionso, kasi Yandi tubaka, “Tata, Mu ke kukisantisa Munu mosi samu na bawu. Mu ke kukisantisa Munu mosi.”

⁶⁹ Mu vwandaka solula na longi mosi ya ntwenia mazono, mu ke kwenda longa na yinzo-Nzambi ya yandi na bankokila kuna na bala-bala ya nene. Mpe mu yufulaka yandi kima mosi, yandi tubaka, “Yinga, Mpangi Branham, kasi mingi ya bantu ya munu ke kwikilaka yawu ve.”

Mu tubaka, “Mingi ya bawu kele bantu ya misiku?”

⁷⁰ “Yinga.” Mpangi-bakala ke kwikilaka yawu ve. “Kasi,” yandi tubaka, “samu na bawu!” Oh, mu zolaka pamuka na laka ya yandi. “Samu na bawu, beno me mona, mu ke kukisantisa munu mosi samu na bawu.”

⁷¹ Oh, Yesu vwandaka longusa bantu kumi na zole, samu ti bantu makumi zole yina kunata Nsangu ya mbote na yinza ya muvimba. Mpe Yandi tubaka, “Samu na bawu Mu ke kukisantisa Munu mosi.” Beno sala yawu samu na nkalani ya beno, samu na muntu yankaka. “Kusadila kimpwanza ya nge mutindu vwale,” Paul tubaka, “kasi kukisantisa nge mosi!” Beno zinga na bankalani ya beno, mutindu Muklisto ya kieleka lendaka zinga. Na bangwisani ya beno, kana beno kutana na mbeni ya beno, beno kukisantisa beno mosi samu na yandi, beno me zaba ve yina beno lendaka sala.

⁷² Ntangu yayi kutula mwana na kisika. Kima ya ntete ntangu mwana me kuma, yandi me kuma mwana, kasi na manima beto me mona ti kikalulu ya yandi kele yina ke sala yandi kubaka lukumu ya bana, kana yandi me sala mbote to ve.

⁷³ Mpe ya ke pentecotisme... Ntangu yayi beno bika mu talisa na beno ti Pantekote kele denomination ve. Ba-Baptiste yikwa kele awa yina vwandaka ba-Baptiste, yina kuzwaka Mpeve-Santu, beno telemisa maboko ya beno. Beno me mona? Ba-Methodiste yikwa kele awa yina kuzwaka Mpeve-Santu, beno telemisa maboko ya beno. Ba-Nazaréen yikwa kele awa yina kuzwaka Mpeve-Santu, beno telemisa maboko ya beno. Ba-Presbytérien, yina kuzwaka Mpeve-Santu? Beno me mona? Ba-Luthérien? Ba-denomination yankaka, yina vwandaka ata fioti ve na Pantekote, yina vwandaka na mwa denomination, yina kuzwaka Mpeve-Santu, beno telemisa maboko ya beno. Beno me mona? Na yawu Pantekote kele denomination ve, ya ke nzingilu.

⁷⁴ Ntangu yayi, Nzambi kotisaka beno na Nzutu ya Klisto. Ntangu yayi yinki Yandi ke sala? Na manima ya beno kukisiamisa beno mosi, beno me kukisantisa beno mosi na kikalulu ya mbote, beno me tumama na Mpeve-Santu, kukondwa kukipe yina yinza me tuba.

⁷⁵ Mu—mu ke zonzila yawu na nswalu nionso, beno me mona, samu... Mu ke tuba yawu ve samu na kulwadisa. Mu—mu... ve—ve—ve beno lemvakila munu, beno me mona. Beno banza ve ti mu zola beno mpasi. Mu—mu zola vwanda mutindu yina ve. Yina ke salaka munu mpasi, ya ke ntangu mu ke longa na bantu Kieleka yayi Nzambi me tinda, mpe ba ke baluka mpe

ba ke landila kaka na kusala mambu ya mutindu mosi, mpe ba ke tuba ti ba ke na Mpeve-Santu. Yina ke bebisa beno kaka, beno me mona. Yinki kele diambu? Ba ke vutuka mbala mosi na diambu ya mutindu mosi, kaka mutindu bana ya Israel, zolaka kuvwanda na ntinu na mutindu ti ntinu yayi kuyala na zulu ya bawu mpe kupusa bawu na kusala mutindu mosi na ba-Amoréen na ba-Amalécite mpe ba-Philistin.

⁷⁶ Beno zaba, bamama, ya ke yimbi na kulgata ba-pantalon? Beno zaba yinki? Beno zaba ti ya ke yimbi na kuzenga bansuki ya beno? Beno zaba ti ya kele yimbi, tata, samu na nge na kulandila kunwa fumu mpe kusala mambu yina nge ke salaka? Beno zaba ti ya ke yimbi samu na beno na kukondwa kuvwanda bakala ya makwela na dibuta ya beno, kento ya beno ke kubwa ngambu mpe ya ke basisa beno na nganda mpe beno ke tuba, “Yinga, sakumuka, cherie ya munu, mu ke kwisa vutuka”? Beno zaba ti beno... Yinki mutindu beno lenda twadisa Yinzo ya Nzambi na ntangu beno lenda kuyala ve na yinzo ya beno? Yina kele kieleka. Beno zaba, mpangi-kento, ti bakala ya beno kele kaka bakala ya beno ve, kasi yandi kele mfumu ya beno? Nzambi me tuba mutindu yina. Samu ti bakala kuvunamaka ve, ya ke kento kuvunamaka. Mpe beno balongi ke landila na kusala bakento ba-pasteur mpe balongi na mabuundu ya beno, na ntangu beno me zaba ti Ndinga ya Nzambi me fundisa yawu.

⁷⁷ Beno ke sadila ntangu nionso nkumbu yina “Tata, Mwana na Mpeve-Santu” samu na kubotika, na ntangu ya ke ata na mwa Disonuku ve ke simbisa yawu na kati ya Biblia. Mu zola ti archevêque mosi to konso muntu yina na kutalisa munu kisika muntu mosi na kati ya Biblia yina ba botikaka na nkumbu ya “Tata, Mwana, Mpeve-Santu.” Mu ke zola ti muntu mosi kutalisa munu muntu yina ba botikaka na nganda ya Nkumbu ya Yesu. Kasi Jean vwandaka ve... botikaka, ba botikaka bawu samu na kukwikila na Yina vwandaka kwisa, kasi ba zabaka ve nani Yandi vwandaka. Kasi na ntangu bawu zabaka yawu, ya lombaka ti ba botika bawu diaka na Nkumbu ya Yesu Klisto. Mu ke zola ti muntu mosi ku... Mu—mu yufulaka na ba-Assemblée de Dieu, na balongi yankaka, ba-Baptiste, ba-Presbyterien, mpe bayankaka. Ba ke manga, ba ke manga na kuzonzila yawu. Mu ke zola kumona Masonuku.

⁷⁸ Na manima munu “fanatiki,” huh, na manima munu “kilawu,” yintu ya munu ke sala mbote ve, mu ke “kilawu,” kaka samu mu ke na kumeka na kutubana beno Kieleka? Ntangu yayi, ya—ya kieleka, bampangi. Kana muntu mosi me kukipesa na Nzambi, beno fwana kukipesa, ya muvimba na A tii na Z. Beno—beno—beno—ba me—ba me tula beno na nganda, beno ke—beno ke kivangu ya luswaswanu.

⁷⁹ Ba me bokila bantu mingi, ba me pona bantu fioti. Yinga, ba me bokila bantu mingi, beno ke na lubokilu na kati ya ntima ya

beno, "Yinga, mu ke kwikilaka ti Nzambi ke zolaka munu. Mu ke kwikila ti Yandi ke zolaka munu."

⁸⁰ Kasi, mpangi-bakala, yayi, beno ke zimbana mutindu bayankaka, samu ba ke kwisa kuna na kilumbu yina, ba ke tuba mpe, "Mfumu, mu basisaka bampeve ya yimbi na Nkumbu ya Nge. Mu salaka mambu yankaka na Nkumbu ya Nge. Mu vwandaka na balukutakanu ya kubeluka ya nzutu. Mu longaka Nsangu ya mbote. Mu basisaka bampeve ya yimbi."

⁸¹ Mpe Yesu tubaka, "Kwenda ntama, Mu me zaba nge ve, muntu ya luvunu. Ya ke yina ke sala luzolo ya Tata ya Munu!" Samu na yinki bantu lenda mona yawu ve? Ntangu yayi, mu zaba ti yina ke sala mpasi. Mpe mu zola ve—mu zola ve kulwadisa beno, mu zola lwadisa beno ve. Kasi, mpangi ya munu, mu—mu . . .

⁸² Ya ke monana ti beto ke na ntangu ya nsuka, mpe Nzambi ke na kupesa lukumu na bana, ke na kutula na kisika na kati ya Dibuundu, na kati ya Nzutu ya Klisto, bantu ya Yandi. Ntangu yayi, ya ke vwanda na bantu mingi ve Yandi ke kotisa kuna, mu ke tuba yawu na beno na kubanda. Beno ke tuba, "oh, mbote, ya ke vwanda na bantu mingi!" Kasi bamvula mafunda sambanu me luta ya ke na kubasisa bawu kuna, mpe. Beno bambuka moyo, mvumbukulu ke sala mpe me zanguka na zulu na bawu. Kaka bantu fioti, beno me mona. Beno sosa mpulusu ya beno, na nswalu nionso. Beno kukitala samu na kuzaba yina ke tambula mbote ve. Beno me mona? Beno me mona yawu yina—yawu yina kele diambu. Mu zaba ti ya ke—ya ke sala mpasi, kasi mpangi ya munu, ya ke Kieleka. Ya ke Kieleka ya Nzambi. Lukumu ya bana!

⁸³ Beto fwana vwanda na tiya-tiya samu na Nzambi, beto lendaka vwanda na kisalu mwini mpe mpimpa. Kima mosi lendaka kanga beto nzila, mpe beto lendaka vwanda na lembami mingi mpe na zola mingi, mpe na lutondo mingi mpe ya kufwana mingi na Klisto na baluzingu ya beto. Ya ke luzingu ya konso kilumbu. Yesu tubaka, "Beno tala felele yayi lis ya bilanga, mutindu ya ke kulaka, ya ke salaka mpe sietaka bilele; kasi mu ke na kuzabisa beno ti Salomon na nkembo ya yandi kuzwaka ve kinkuti ya kulutila kitoko na mosi ya bafelele yayi." Salomon vwandaka na bilele yina vwandaka lwata bilele ya ntalu ya soie mpe ya kutunga na ba dese mpe nionso yina, Kasi ya kele ve—ya kele ve . . . yawu yina ve Yandi vwandaka zonzila. Samu felele yayi lis kukula, ya fwana sala na mwini mpe na mpimpa. Samu na yinki beno zola kwenda kukangama na mwa nsongi ya nsinga? Kana ya kele mpasi na muntu ya mbote na kuzwa mpulusu, wapi mutindu ke vwanda musendo ya muntu ya masumu (ya ke muntu mumpani) mpe muntu ya yimbi, muntu ke kuwaka Ndinga mpe ke manga na kutambula na Yawu? Ntangu yayi yinki beto ke sala? Beno me mona? Ntangu yayi ti . . .

⁸⁴ Awa, ntangu yayi, yayi kele yinzo-Nzambi ya beto. Beto ke na banzenza yiya to tanu na kati ya beto. Kasi ya kele dibuundu, mu ke na kupesa beno dilongi. Ba ke baka yawu na ba-bande. Mu zola ti bantu yina ke kuwa ba-bande, kubambuka moyo ti, yayi me tala dibuundu ya munu. Ntangu mu ke kuna na nganda, mu kemekaka na kuvwanda muntu ya luzitu mingi samu na kutuba na bawu ti, samu na kumeka fioti na kubondila bawu na mabanza ya bawu ya miliki ya mpamba. Kasi ntangu kana ya me kuma ntangu ya kutuba Kieleka, beto tuba Yawu.

⁸⁵ Lukumu ya bana, kutula na kisika! Wapi bawu kele? Beno talisa munu kisika bawu kele. Nzambi ke na kubokila bana ya Yandi na kutulaka bawu na lweka na nzila ya kumonisama. Ba lenda tuba mpova mosi ve samu na yawu, beno ke mona ti kima mosi me salama. Yandi ke na kutula mwana ya Yandi na kisika, ke na kupesa yandi kisika kieleka bima ya mutindu mosi. Yandi—yandi ke kaka na kiyeka ya mutindu mosi, ndinga ya yandi kele kaka mutindu mosi na Archange, ata mpe kulutila yawu. Ba pesaka lukumu na mwana, ba tulaka yandi na kisika ya zulu, ba twadisaka yandi kuna, ba vwandaka lwatisa yandi bilele yankaka, ya bantinta ya mutindu yankaka. Tata vwandaka sala mukembo, yandi vwandaka tuba, “Yayi kele mwana ya munu, kubanda ntangu yayi yandi ke muyadi. Yandi muntu ke twadisa. Yandi ke yala difwa ya munu nionso. Nionso yina mu ke na yawu kele ya yandi.” Ya kieleka. Na manima beto ke vutukila diaka, Elah, Elah, Elohim, Elohim, beno me mona, kisika Yandi ke zingaka na yandi mosi. Na manima beto vutuka na Yehowa Yina salaka kima mosi, Ya pesaka muntu luyalu na zulu ya ntoto. Yinki beto ke na kuvungila? Bakutalisama. Ntoto ke na kunienga. Beto kwenda mpe beto tanga yawu. Mbote mingi.

...zabaka na ntwala...na lukumu ya bana na nzila
ya...yandi mosi, kulantila mambote ya luzolo ya
Yandi,

Samu na luku-...samu na lukumu ya nkembo ya
lemvo ya yandi,...

⁸⁶ Yinki kele lemvo ya Yandi? Ntama mingi kuna na ntwala, ntangu Yandi vwandaka ve Tata; Lemvo ya Yandi, zola ya Yandi, salaka Yandi mwana, ti ba zaba beto na ntwala samu na lukumu ya bana, samu na lukumu ya lemvo ya yandi. Beno me mona?

...na yawu yandi me ndima beto na nzila ya (Muntu
yayi) ya luzolo, yina kele Klisto.

⁸⁷ Yandi ndimaka beto yinki mutindu? Na nzila ya Yandi. Yinki mutindu beto ke kota kati na Yandi? Na nzila ya Mpeve mosi, beto nionso me botama kati na Yandi. Beno kuwa.

Kati na yandi beto ke na mpulusu, beto ke na mpulusu
na nzila ya menga ya yandi, mulemvo ya m-a-s-u-m-
u...

⁸⁸ Yinki mutindu beno lenda longa luzabu ya mantwala, kukubika ya mantwala ya Nzambi mpe kutula na kisika, kukondwa ya kuvwanda na mulemvo ya masumu kisika mosi kuna? Samu na yinki? Konso kilumbu beno ke salaka kifu, konso kilumbu beno ke salaka kima mosi ya yimbi. Kasi kana beno me butuka mbala zole, bakala to kento, ntangu beno ke sala kifu, Nzambi me zaba ti beno ke vwanda na kiadi samu na yawu. Beno lendaka telema na mvwandulu ya—ya Mfumu ya yinsi Roosevelt to mosi yankaka, mpe kutuba, “Mu me sala yimbi, Nzambi kulemvokila munu samu na diambu yayi.” Samu na yinki? Mpe ya ke kisika yina Menga ya mulemvo... .

⁸⁹ Beno tala ya ke “m-a-s-u-m-u.” Nsumuki kele nsumuki, yandi ke salaka masumu ve. Kasi dibuundu ke salaka masumu, ya ke salaka yimbi, ya ke na dibanza ya yimbi, ngindu ya yimbi, yandi ke salaka bifu, yandi ke tingunaka mutindu mwana ya fioti ke na kutambula, mutindu mwana ya fioti ke na kumeka na kutambula. Yandi zaba ntete ve kutambula, samu yandi kele mwana ya fioti. Kasi ya ke na Diboko mosi ke kulumuka na sika ya beto kana beto... ya ke kanga beto mpe lembika beto, mpe ke tuba, “Tambula mutindu *yayi*, mwana.” Yandi ke baka beto ve mpe ke bula beto fimbu na manima samu beto me sala kifu, Yandi ke bula beto ve pene ya lufwa samu beto ke na kumeka na kutambula. Yandi ke zolaka beto mutindu beto ke zolaka bana ya beto.

⁹⁰ Tata ya kieleka mpenza, ke bula ve mwana ya yandi fimbu na ntangu yandi ke na kumeka na kutambula, kana yandi kubwa na ntoto. Yandi ke simba yandi na diboko na diboko ya kikesa mpe ke telemisa yandi, yandi ke baka yandi na maboko ya yandi zole, yandi ke tuba, “Nge fwana sala mutindu *yayi*, mwana. Tambula mutindu *yayi*.”

⁹¹ Nzambi ke salaka mutindu yina na Dibuundu ya Yandi! Yandi ke tanda diboko mpe ke baka yandi na maboko ya Yandi, ke telemisa yandi mpe ke tuba, “Tambula mutindu *yayi*, mwana. Tala, kutuba yawu ve—ve—ve mutindu yina, tuba yawu mutindu *Yayi*. Ntangu *yayi*, ata ti dibuundu me tuba mutindu *yayi*, yina *yayi* me tuba, nge tuba yawu mutindu *Yayi*. Mutindu *Yayi*, ya fwana vwanda *Yayi*! Kana Ndinga ya Munu me longa *Yawu*, beno kangama na *Yawu*, beno tambula na *Yawu*. Beno kangama kaka na *Yawu*. Beno kipe ve yina muntu yankaka ke tuba, beno kangama kaka na *Yawu*. Beno tambula na *Yawu*. Ya ke mutindu *yayi* nge fwana tambula.”

⁹² Masumu ya beto; mulemvo ya zola samu na masumu ya beto, kana ve beto ke vwanda na siansi ve. Beto lendaka kangama na Bandinga *yayi*!

...kulandila bumvwama ya lemvo ya yandi;

Yina yandi—yandi mwangama na mutindu ya kufuluka...

⁹³ Yinki zola tuba “ya kufuluka”? Oh, la la! Kisika Yandi mwangaka na mutindu ya *kufuluka*, “mabuki mingi ya yawu.”

...*yandi me mwangisa na mutindu ya kufuluka na zulu ya beto ndwenga mpe mayele ya mutindu na mutindu;*

⁹⁴ “mayele, ndwenga ya mutindu na mutindu Yandi me mwangisa na zulu ya beto.” Na “ndwenga” ya mutindu na mutindu, ya yinza ve. Ndwenga ya yinza kele bulawu samu na Yandi, mpe ndwenga ya Nzambi kele bulawu samu yinza. Ya ke kaka mutindu mwini na mpimpa, mosi lenda wisana na yankaka ve. Kasi ntangu mwini ke banda na kubasika mpe kuma kutia, mpimpa ke zimbana sika na sika. Mpe ntangu Nsemo ya Nsangu ya Mbote ke banda na kukota, bima nionso ya yinza ke banda na kuzimbana. Mpe yinki ya ke salaka? Yandi ke mwangisa na mutindu ya kufuluka Nsemo ya mwini na zulu ya bana ya Yandi, yina ke na kutambula kati na Nsemo, yina me twadisama na Mpeve ya Nzambi, yina me fuluka na lemvo ya Yandi, na mayele mpe ndwenga ya mutindu na mutindu, lubakusu, na kiyeka ya kuzaba yinki mutindu kutambula. Kana beno me mona ti ya kele yimbi, na yawu beno vwanda na mayele na yina beno ke na kusala, mutindu beno... Kana ya kele yimbi, beno vwanda na mayele ata mpe na mutindu ya beno ya kubelema na yawu. Na mayele! Beno tala yawu mbote-mbote, beno vwanda na kieleka ti beno zaba mutindu ya kubelema na yawu. Beno vwanda na nkebolo mutindu nioka, beno vwanda ya kuvedila mutindu yembe. Yawu yina Yesu tubaka.

⁹⁵ Oh, yawu yina ba-pepite, bankundi ya munu! Beto lendaka telema bilumbu na manima ya bilumbu. Ya ke kitoko ve? Nkebolo, ndwenga, Yandi me mwangisa yawu na mutindu ya kufuluka na zulu ya beto, ya me mwangisa yawu! Yandi pesaka beto ve lutu mosi, kasi ya bakaka pawu ya nene mpe ya tindaka yawu mutindu yina. Yandi mwangaka yawu na zulu ya beto, ndwenga na nkebolo ya lemvo ya Yandi! Oh, lemvo ya ngitukulu, muningu ya lembami!

Ntangu yayi, yina yandi me mwangisa na zulu ya beto na ndwenga nionso... nkebolo;

Yandi me zabisa na beto mansweki ya luzolo ya yandi,...

⁹⁶ Yandi ke na kutuba na nani? Na ba-denomination? Beno lemvokila munu, bampangi ya munu, beno banza ve ti mu ke na kuvweza denomination ya beno, mutindu yina ve. Mu ke meka na kutuba na beno ti ya vwandaka kima ya yimbi na kubanda. Yesu tubaka, “Beno kwenda longa Nsangu ya mbote,” beto me kwenda mpe beto me sala ba-denomination. Kikuma yawu yina beto me kuzwa Yawu ve, beto ke landa ndwenga ya muntu. Kana Calvin lendaka vumbuka!

⁹⁷ Tala, ntama mingi ve mu telemaka pene-pene ya ntoni ya muntu mosi ya nene, reformateur mosi ya nene. Mpe mu banzaka, yandi vwandaka muntu ya nene! Yandi vwandaka muntu ya nene! Mbote, yawu... Mu zola ve... Ya vwandaka John Wesley. Mpe mu banzaka, kana John wesley lendaka vumbuka na ntoni bubu yayi mpe yandi tala mutindu ya dibuundu ya yandi, yandi ke vwanda na nsoni samu na nkumbu ya yandi. John Wesley vwandaka muntu ya santu, nkuni yina ba me basisa na tiya, mutindu ya bokilaka yawu. John Wesley vwandaka muntu mosi ya santu yina kwikilaka na Nzambi, mpe landaka Yandi kitambi na manima ya kitambi. Kasi na manima ya lufwa ya John, bawu tubaka, "Beto ke sala dibuundu samu na lukumu ya John, mpe beto ke bokila yawu dibuundu ya ba-Methodiste samu na mutindu ya yandi ya kusantisama mutindu kisalu ya zole ya lemvo."

⁹⁸ Na yawu ba salaka dibuundu, mpe bubu yayi bantu ya dibuundu ya bawu ke manga mambu yina nionso Wesley zonzaka. John Wesley longaka kubeluka ya nzutu ya Bunzambi. John Wesley kwikilaka na mbotika ya Mpeve. John Wesley kwikilaka na kuvutuka ya muvimba ya makabu. John Wesley, Martin Luther, mingi ya bantu yina ya nene zonzaka na bandinga ya malu-malu mpe tendulaka. Mpe, bubu yayi, kana beno lendaka tuba na bandinga ya malu-malu na dibuundu ya ba-Methodiste to na dibuundu ya ba-Luthérien, ba ke losa beno na nganda. Yinki kele diambu? Kaka na ntangu beto lendaka tula bana na kisika ya bawu, yinki kele diambu? Ba me ndima kima yankaka, samu bawu zaba ve mansweki ya Nzambi. Mpe ba ke zaba Yawu ata fioti ve na nzila ya seminere!

⁹⁹ Beno bika mu tangila beno kima mosi. Ya ke mbote mingi? Mbote mingi. Beto banda, mu ke na kima mosi mu sonikaka awa. Beto tala yinki mutindu Paul... Ntangu yayi, awa, yayi kele mulongi ya Nsangu yayi. Beto kwenda na Actes 9:5, kaka na muniti mosi. Beno kuwa mutindu Paul kuzwaka Luzayikisu yayi, ata nionso yina salamaka. Ntangu yayi, na Actes 9 beto ke banda na kutanga, mutindu yayi. Yayi ke dilongi ya lukolo ya Lumingu, na yawu samu na yinki ve—samu na yinki ve kutanga yawu? Beno zabisa munu na ntangu mu ke vwanda...?

Mpe Saul, vwandaka bika ve na kusosa kufwa...
(Oh, Juif yayi, na mbombo mutindu ndobo, muntu ya nganzi!)... kufwa bilandi ya Mfumu, yandi kwendaka tala nganga-Nzambi ya mbuta,

Mpe lombaka yandi mikanda yina fwanaka pesa yandi muswa ya kukota na mbanza Damas na bayinzo ya bisambu, samu ti kana yandi kuta bantu kuna...

¹⁰⁰ "Mu ke kwenda sosa bawu! Kana mu kuta bawu kuna, tala, yina mu ke sala bawu! Beno me mona, kana mu kuta bawu kuna!" Kasi ba zabaka yandi na ntwala!

¹⁰¹ Yinki ke tuba na beno ti muteki yina ya alkole kuna ba zabaka yandi ve na ntwala samu na Luzingu? Yinki ke tuba na beno ti kento yina ya kindumba beno zola ve kuzonza, yinki ke tuba na beno ti mwa mbote mpe kubokila yandi na kukwisa na yinzo-Nzambi lendaka sala yandi ve santu ya Nzambi, kuna na Nkembo? Ntangu... Yinki ke tuba na beno ti yandi kele mosi ve? Yawu yina beto zaba ve. Kasi yawu yina nsatu ya beto. Ya ke mutindu mulobi mbisi losaka filé na nzadi mpe yandi bendaka yawu, yandi kangaka bakiula, bambisi, bambalambongo, banzanzalakonzi ya masa, mpe bima yankaka, kasi yankaka vwandaka bambisi. Yandi zabaka ve, yandi losaka kaka filé. Yawu yina beto ke salaka. Beno tala Paul.

...lombaka yandi *mikanda yina fwanaka pesa yandi muswa ya kukota na mbanza Damas na bayinzo ya bisambu, samu ti, kana yandi kuta bantu kuna, babakala to bakento, yandi kanga bawu bansinga mpe yandi nata bawu na Jerusalem.* (Mpangi-bakala, yandi vwandaka kieleka muntu ya kukondwa mawa!)

Mpe yandi vwandaka kwenda kuna, yandi kumaka pene-pene ya mbanza Damas: mpe na mpamukunu nsemo semaka mpe zungaka yandi...

¹⁰² Nganga-Nzambi mosi kumaka kuna na nzila, Docteur F. F. Jones, mpe tubaka na yandi, "Nge ke na mfunu ya nzingilu ya seminere ntangu yayi, mwana, mpe mu ke kwikila ti Nzambi lendaka sadila nge"? Ya ke vwanda kiadi na kutala Masonuku ya mutindu yayi, mutindu yina ve? Ntangu yayi, ya ke kaka mbote ti... Mu ke tuba yawu ve samu na kusala nsaka. Ya ke, beto, ya ke simba kaka mutindu yina beto ke na kusala bubu yayi. "Nge zaba, mama ya nge vwandaka kento ya mbote, mu ke kwikila ne ke vwanda mulongisi ya mbote." Beno tala yina salamaka.

Mpe mutindu—mpe mutindu yandi vwandaka kwenda kuna, yandi kumaka pene-pene ya mbanza Damas: mpe na mpamukunu nsemo semaka mpe zungaka yandi kuna, nsemo mosi... (fiu, na kubanda ya ke ya mazulu)... nsemo mosi katukaka na mazulu:

Mpe yandi kubwaka na ntoto, mpe yandi kuwaka ndinga mosi kutuba... Saul, Saul, samu na yinki nge ke niokula munu?

Mpe yandi tubaka, Nge kele nani, Mfumu? Mpe Mfumu tubaka na yandi, Mu kele Yesu yina nge ke na kuniokula: mpe ya ke mpasi samu nge na kumona mpasi ya mpamba mutindu ngombe yina ke na kunwana na yinti ya nsongi ya mfumu ya yandi.

Mpe yandi tekitaka mpe vwandaka yituka mpe tubaka, Mfumu, yinki nge zola ti munu... sala? Mpe Mfumu tubaka na yandi, Telema, mpe kota na mbanza, mpe, mpe kuna ba ke tubila nge yinki nge ke sala.

¹⁰³ Mpe bantu yina vwandaka sala nzyetolo na yandi, mpe bawu kwendaka, mpe bawu monaka muntu mosi. Ananias, kuna, monaka vision. Nionso ya kimpeve! Mpe kiboba yayi Saul, muntu yayi ya nkelle! Ananias kuna monaka vision, yandi talaka na yinzo ya yandi. Yandi vwandaka profete, yandi vwandaka ke sambila na kati ya yinzo ya yandi, mpe yandi monaka vision. Yandi... Mfumu zonzaka na yandi mpe tubaka, "Ya ke na bakala mosi ke na kwisa kuna na bala-bala, yandi me kufwa meso mutindu mbulu-mbulu, mpe nkumbu ya yandi kele Saul, yandi kele Saul ya Tarse."

¹⁰⁴ Yandi tubaka, "Mfumu, mu me kuwa mambu ya nene. Kutuma munu ve, mu ke muntu ya fioti."

¹⁰⁵ Yandi tubaka, "Kasi, tala, kuna na nzila, mu me talisa yandi vision mosi. Mu me talisama na yandi na kati ya Dikunzi ya Tiya. Mu me kufwa meso ya yandi na mutindu ya kulunga. Mpe ya lombaka ti Mu kufwa meso ya yandi mpe kupanza yandi na ntewala Mu sala kima mosi na yandi. Beno me mona, Mu fwanaka panza théologie ya yandi nionso. Nge zaba, yandi vwandaka—yandi vwandaka muntu mosi ya nene na kati ya mosi ya mabuundu yina kuna. Yandi vwandaka na ba-diplôme ya mutindu na mutindu, yandi vwandaka ve na nsatu ya kusikidika malongi ya yandi na kima mosi, kasi," Yandi tubaka, "ya lombaka ti Mu basisa nionso yina na kati ya yandi."

¹⁰⁶ Yawu yina vwandaka diambu. Ya lombaka ve kupesa yandi mambu mingi, kasi kubasisa yawu na kati ya yandi. Mu banza ti diambu yawu yina na mingi ya ba-clergé ya beto bubu yayi; beno fwana basisa yawu na kati ya beno, na yina Nzambi lenda kotisa Mpeve-Santu. Beno basisa yawu! Na yina, yandi tubaka ti yandi...

¹⁰⁷ Mpe yandi tubaka, "Mfumu, kasi muntu yayi—yayi—yayi kele muntu ya ntitisa."

¹⁰⁸ Yandi tubaka, "Kasi, tala, yandi ke na kusambilia. Ntangu yayi, kulumuka na bala-bala mosi mpe nge ke kuma na dibulu mosi ya masa. Nge ke luta dibulu ya masa yina na diboko ya kimama, mpe nge ke kulumuka kuna. Ya ke vwanda na yinzo mosi ya mpembe, mata kuna mpe bula na kielo. Yandi ke vwanda ya kutandama kuna na couloir, ba lendaka nata yandi ntama mingi ve. Tetika maboko ya nge na zulu ya yandi, nata yandi kuna na nzadi ya Damas mpe botika yandi na Nkumbu ya Yesu. Mpamba ve, Mu ke tuba na nge yina Mu ke sala, ba ke niokula yandi mingi samu na Munu, samu yandi kele munati-nsangu ya munu na Bantu ya makanda." Amen!

¹⁰⁹ "Mbote, ntangu yayi, vingila fioti, Mfumu! Ntangu yayi, yinki lukolo mu ke longisila yandi?" Mu ke tuba na beno yina beto ke sala, beto tanga ba-Galate mpe beto tala yina ya me tuba. Kaka na kapu yina ke landa—landa kuna. Beto baka ba-Galate 1, mpe beto banda na nzila ya 10, mpe beto tala lukolo yina Paul

kwendaka, yinki seminere, mpe yinki maboko ba tetikaka na zulu ya yandi, mpe, oh, nionso yina salamaka. Ba-Galate kapu 1. Samu na sala nswalu, beto banda kisika yina ba ke tubila kubalula ya ntima ya yandi, na nzila ya 10.

Ntangu yayi beno ke na kubanza ti mu ke sosa bantu kundima munu, to Nzambi? to mu ke sosa kuyangidika bantu? samu kana mu sosa kuyangidika bantu, mu zolaka vwanda ve kisadi ya Klisto.

¹¹⁰ Oh, la la, la la, la la! Beno bika mu tuba mwa kima mosi na ntwala awa. Ba-Galate 1, beno baka kapu 8. Bantu yikwa kuzaba ti Paul vwandaka muntu yina salaka ti bantu kubaka diaka mbotika na Nkumbu ya Yesu, na ba-Actes 19? Ya kieleka. Beto banda fioti na zulu awa, nzila ya 8–8.

...kana beto, to wanzio mosi me katuka na zulu, kulonga beno nsangu ya mbote ya kuswaswana na yina beto longaka beno, bika ti yandi vwanda ya kusinga.

¹¹¹ Wapi nge me baka Nsangu ya mbote yayi, Paul? Nzila ya 9.

...beto zabisaka beno yawu, mpe mu ke na kuzabisa diaka yawu ntangu yayi, Kana muntu mosi kulonga na beno nsangu ya mbote ya kuswaswana na yina beno me kuwa, me kuyamba, bika ti yandi vwanda ya kusinga.

¹¹² Kana yandi kele archange, kana yandi kele évêque, kana yandi kele surveillant général, kana yandi kele Docteur Kingandi, ya vwanda konso muntu yina, kana yandi ke longa ve mbotika ya masa na Nkumbu ya Yesu Klisto, mbotika ya Mpeve-Santu, kana yandi ke longa ve kuvutuka ya makabu, Kwizulu ya Klsto, mambu yayi nionso, bika yandi kuvwanda ya kusinga! Kana yandi ke meka na kubaka Ndinga yayi awa mpe yandi ke tuba ti yawu vwandaka samu na kilumbu yankaka mpe ke yika mwa mabanza ya malu-malu ya buzoba yina ba me longusa beto na seminere, bika yandi kuvwanda ya kusinga!

¹¹³ Beto landila na kutanga, samu na kumona mutindu Paul kuzwaka yawu, kumona yinki mutindu, yina mu ke meka na kutuba na beno na suka yayi.

Ntangu yayi beno ke na kubanza ti mu ke sosa bantu kundima munu, to Nzambi? to mu ke sosa kuyangidika bantu? samu kana mu sosa kuyangidika bantu, na yawu mu zolaka vwanda ve kisadi ya Klsto.

¹¹⁴ Yinki mutindu mu lendaka vingila kima mosi, yinki mutindu muntu yina ke zolaka Nzambi, mpe mulongi, mingi-mingi, lendaka vingila kima yankaka na nganda ya kuyina yandi na bantu? Bantu ke yina beno. Mbote, bawu tubaka... Yesu tubaka, “Kana ba ke bokila Munu, Mulongisi ya yinzo... Mu ke Mulongisi, ya kulutila nene na kati ya beno nionso. Mu kele Yina lenda sala bimangu ya kulutila mingi kulutila mpe kusala ya mingi na Mpeve-Santu kulutila beno nionso, samu Mu ke na

muvimba ya kufuluka na kati ya Munu. Mpe kana ba me bokila Munu ‘Béelzébul,’ mbala yikwa ba ke bokila beno mutindu yina? Kasi,” Yandi tubaka, “beno kukiyangisa ve samu na yina beno ke tuba, samu ya ke vwanda beno ve ke tuba, ya ke vwanda Tata yina ke zingaka na kati ya beno, ke tuba na ntangu yina. Beno kangama kaka na Ndinga.” Mpe Yandi, ntangu Yandi manisaka na kusonika Buku, Yandi tubaka, “Muntu yina ke katula Ndinga mosi ya Buku yayi to ke yika ndinga mosi na Yawu, ba ke katula yandi na Buku ya Luzingu, yandi yina.” Nzambi kusadisa beto na kubikala kaka na Yawu!

¹¹⁵ Ntangu yayi nzila yina me landa, beno bika mu tanga ntangu yayi, mu tanga yawu nswalu ntangu yayi.

Kasi mu ke na kutubila beno... Ya zola tuba ti, mu ke kutana na beno na lusambusu na yayi. Mu ke na kutubila beno ti nsangu ya mbote yina mu longaka katukaka na muntu ve.

Ntangu yayi, mu kele ve Methodiste, Baptiste, Presbytérien, to Pentecotiste; ya katukaka na muntu ve. To . . .

Samu mu kuzwaka yawu na muntu ve, to longukaka yawu ve, . . .

¹¹⁶ “Mu kuzwaka yawu na muntu ata fioti ve, na seminere ve, na docteur mosi ve, na théologien mosi ve, na lukolo mosi ve. Mu kuzwaka yawu mutindu yina ata fioti ve, mu longaka yawu mutindu yina ata fioti ve, mu monaka yawu mutindu yina ata fioti ve, yawu kwisaka na munu mutindu yina ata fioti ve.” Na yawu yinki mutindu yawu kwisaka, Paul?

. . . *longaka yawu, kasi na luzayikisu ya Yesu Klisto.*

¹¹⁷ “Ntangu Klisto kukitalisaka Yandi mosi na munu, ti Yandi vwandaka Mwana ya Nzambi, ntangu Dikunzi yina ya Tiya kulumukaka na zulu ya kilumbu yina, mu tubaka, ‘Nani Nge kele, Mfumu?’ Yandi tubaka, ‘Mu kele Yesu.’”

¹¹⁸ Ntangu yayi, mu ke talisa na beno yina—yina salaminaka yandi. Ntangu yayi, kaka na ntangu yayi kana mpangi mosi ke na nzingilu, ba ke pesa yandi bamvula kumi samu na kulonguka Grec, mpe bamvula kumi yankaka samu na kulonguka kima yankaka, mpe na ntangu yina yimeni samu na yandi. Beno tala.

. . . *Samu mu kuzwaka yawu na muntu ve, to longukaka yawu ve, kasi na luzayikisu ya Yesu Klisto.*

Samu beno kuwaka masolo ya munu na bantangu me luta kati nsambulu ya ba-Juif, . . .

¹¹⁹ “Mu vwandaka docteur ya nene, mwana. Mu vwandaka na nionso.” Yandi longusamaka na Gamaliel, mulongisi ya nene yina ba vwandaka na yawu na yinsi. Bantu yikwa kuzaba ti Gamaliel vwandaka mosi ya milongisi ya nene, ya kulutila nene? Yinga, tata. “Nsambulu ya munu ya ba-Juif, mwana, mu vwandaka na yawu na kati ya ntima; mu zabaka mutindu nionso

ya kutuba Credo ya Bantumwa mpe bima yina nionso, beno me mona. Mu zabaka mutindu ya kutuba bisambu nionso ya suka mpe kusakumuna bantu.” Beno me mona?

...*mutindu mu vwandaka talisa mpasi mingi na ntama dibuundi ya Nzambi, mpe vwandaka bebisa yawu:*

Mutindu mumekaka na kukanga nkonga ya ba-exalté yina! Beno me mona? Beno me mona?

Mpe mu zabaka mbote-mbote nsambulu ya ba-Juif...

¹²⁰ “Mu vwandaka muntu ya nene. Mwana, ya kieleka mu... Mu zabaka yawu mbote-mbote, mu talisaka bawu ti mu lendaka diata bawu, samu mu kufwaka Etienne mpe mu me sala mambu mingi yankaka. Beno me mona yina mu me sala!” Mutindu ya vwandaka talisa bantu mpasi!

Mu zabaka mbote-mbote nsambulu ya ba-Juif kulutila bantu ya bamvula ya munu na kati ya yinsi ya munu, mu vwandaka lutila bawu na kunwanina mambu ya kinkulu ya batata ya bawu.

¹²¹ Ntangu yayi, beno bambuka moyo, Ndzinga ya Nzambi ve, “mambu ya kinkulu ya batata,” kinkulu ya dibuundi, na nzonzolo yankaka. “Mu banza ti mu vwandaka Methodiste tii na mikwa, mu vwandaka Baptiste tii na mikwa, mu vwandaka Pentecotiste tii na mikwa.” Oh, ya kieleka? Mu zola vwanda Nzambi tii na mikwa. Yinga, yawu yina. Beno me mona? Mbote mingi.

...*binkulu ya batata ya munu.*

Kasi ntangu ya sepelisaka Nzambi, ... (oh, oh, Paul, nge me kuma kisika yango) ... yina soolaka munu ntete mu butuka, yina mpe nataka munu na yinza yayi, mpe bokilaka munu na lemvo ya yandi,

Samu na kutalisa na munu Mwana ya yandi, ...

¹²² Yinki mutindu? “Mpeve-Santu na kati ya munu! Ya sepelisaka Nzambi na kubaka munu, yina soolaka munu ntete mu butuka, mpe pesaka munu Mwana, yina kele Mpeve-Santu na mutindu ya Mpeve, na kati ya munu, samu kukitalisa Yandi mosi na kati ya munu.” Oh, la la! Fiu! Mu—mu—mu ke kwikila ti mu zola boka fioti.

¹²³ Beno tala, beno bika mu tuba na beno, mpangi-bakala. Ntangu ya sepelisaka Nzambi! Oh, alleluia! Ntangu ya sepelisaka Nzambi! Tata ya kinwa-malafu. Mama mosi... Nzambi sakumuna nge, mama, mu ke tuba kima mosi ve ya yimbi samu na nge. Kasi mama yina zabaka mingi ve samu na Nzambi kulutila kalumbu kuzaba ve ba-sapatu ya mvula-mpembe. Mpe tata yina vwandaka lala na babala-bala na nsi ya kwiti. Mpe mu vwandaka ve na basapatu samu na kukwenda na lukolo, mpe na bansuki ya yinda ke kulumuka na nkingu ya

munu, mpe bantu nionso awa na Indiana vwandaka zola munu ve samu mu vwandaka katuka na Kentucky. Mpe tala, oh, ya vwandaka kitoko ve na kutala. Kasi ya sepelisaka Nzambi! Amen! Ya sepelisaka Nzambi, Yina soolaka munu ntete na kivumu ya mama ya munu, ti Yandi lendaka talisa na munu Mwana ya Yandi, samu na kusala munu longi ya Ndinga, yina ke kangaka kaka na Yawu, samu na kutalisa ba-vision na bidimbu mpe mambu ya ngitukulu mpe bimangu. Mpe, oh, la la!

¹²⁴ Beno me mona yina Yandi vwandaka tubila? Ya sepelisaka Nzambi na kusala mutindu yina! Yinki mutindu? Beno kuwa na bukebi. “Samu na kuta- . . .” Beno baka nzila ya 16 ntangu yayi.

Samu na kutalisa na munu Mwana ya yandi, samu ti mu zabisa yandi na kati ya mimpani; na mbala mosi mu lombaka ve malongi ya dibuundi:

¹²⁵ “Mu kwendaka ata fioti ve na évêque mosi samu na kuyufula yandi yina mu ke sala. Mu kwendaka ata fioti ve na nsuni mpe menga mosi, ata organisation ve to kima yankaka. Mu vwandaka na kima ya kusala na yawu ata fioti ve. Mu lombaka ata fioti ve malongi ya nsuni mosi mpe menga. To mu kwendaka ve na Jerusalem na banganga-Nzambi nionso ya nene ya santu mpe batata ya basantu, mpe bayina nionso, mpe tubaka, ‘Ntangu yayi, beno zaba, mu kuzwaka vision mosi, yinki mu ke sala samu na yawu? Mu me mona Mfumu Yesu ya kusakumuka na vision.’ Bawu tubaka, ‘Basika awa, nge! Yinki ke . . . Nge ke exalté! Mbote, yinki diambu me kumina nge?’ Ve, mu vwandaka na badiplome ya bawu nionso na kubanda. Vwandaka . . .”

¹²⁶ Mpe Paul tubaka awa, mu lenda talisa beno na kati ya Masonuku, ti yandi tubaka ti ya zimbinaka mambu nionso yina yandi longukaka, mpe yandi talaka yawu mutindu kima ya mpamba, ti yandi fwana zaba Klisto. Oh!

To mu kwendaka ve na Jerusalem na bayina vwandaka bantumwa na ntwala ya munu; kasi mu kwendaka na Arabie, mpe vutukaka diaka na Damas.

Mpe na manima ya bamvula tatu mu kwendaka na Jerusalem samu na kumona Pierre, mpe mu bikanaka na yandi bilumbu kumi na tanu.

¹²⁷ Mpe mutindu beto ke landila na kutanga, beto ke mona ti yandi na ntumwa Pierre vwandaka me monana ata fioti ve na luzingu, ba zabanaka ata fioti ve mosi na yankaka, kasi ntangu bawu kutanaka ba vwandaka longa Nsangu ya mbote ya mutindu mosi. Nzambi ke na lukolo mosi. Beno me mona? Yinga!

¹²⁸ Kuvwandaka na Pierre awa, yina telemaka na Kilumbu ya Pantekote, yandi tubaka, “Beno balula bantima, beno nionso, beno baka mbotika na Nkumbu ya Yesu Klisto, samu na mulemvo ya masumu ya beno, beno ke kuzwa dikabu ya Mpeve-Santu.”

¹²⁹ Philippe tubaka, “Oh, mutindu ya ke ya nkembo! Mu fwana sala mpe kima mosi. Kuna na... Ba me bokila munu kuna na Samarie.” Yandi kwendaka mpe bandaka na kupesa kimbangi na bala-bala. Kima ya ntete, mbevo mosi kwisaka, yandi tetikaka maboko na zulu ya yandi mpe bandaka na kudumuka mpe kulemuka. Yandi tubaka, “Nkembo na Nzambi, beto me kuma kisika yango!” Yandi bandaka na kuzwa lukutakanu mosi ya nene. Yandi tubaka, “Beno nionso ke na nsatu ya Mpeve-Santu.” Yandi tubaka, “Yina beno fwana sala, beno fwana baka mbotika na Nkumbu ya Yesu.” Na yawu ya nataka bawu kuna, bawu nionso, mpe botikaka bawu nionso na Nkumbu ya Yesu. Yandi tubaka, “Kwisa, Pierre, tetika maboko ya nge na zulu ya bawu ntangu yayi.” Mpe bawu kuzwaka Mpeve-Santu.

Pierre, kuna na yinzo ya Corneille, mutindu mosi.

¹³⁰ Paul vwandaka me mona yandi ntete ve to me kuwa kima mosi samu na yandi. Kasi yandi lutaka na balweka ya zulu ya Ephèse, mpe yandi monaka bilandi yankaka. Yandi monaka mulongi mosi ya Baptiste, ya vwandaka, Apollos, muntu ya misiku yina balulaka ntima, muntu ya mayele mingi, ya ndwenga, yina vwandaka baka Ngwisani ya Ntama mpe vwandaka siamisa Yawu ti Yesu vwandaka Mwana ya Nzambi. Yinga, tata, yandi vwandaka muntu ya mayele mingi. Mpe ba vwandaka boka, ba vwandaka na kiese. Biblia me tuba mutindu yina. Beno tanga kapu 18 na 19 ya ba-Acte mpe beno tala kana ya ke mutindu yina ve. Bawu vwandaka na kiese, bawu vwandaka kina kati na Mpeve, mpe vwandaka baka mbangu sika na sika, beno zaba. Paul tubaka, “Kasi beno me kuzwaka Mpeve-Santu kubanda beno me kwikilaka?”

¹³¹ Mpe na beno bampangi ya ba-Baptiste yina ke meka na kundimisa yawu na bantu, mpe na kutubaka ti Grec ya kieleka me tuba, “Beno kuzwaka Mpeve-Santu kubanda, to *ntangu* beno kwikilaka?” Mu ke tula ntembe na beno na kunatila munu Grec! Mu ke na Grec ya kieleka awa. Mu kele diaka na Araméen, na Hebreux, diaka. Mosi na mosi ya bawu kutubaka, “Beno me kuzwaka Mpeve-Santu *kubanda* beno me kwikilaka?”

¹³² Beno me vuluka na nzila ya lukwikilu, ya ke lukwikilu ya beno na Nzambi. Menga ke bumba beno kukondwa mvindu na disumu, samu ya ke sala munkayulu. Menga ke vulusa beno ve, Menga ke bumba beno kukondwa mvindu na disumu. Yinki mutindu beno ke tuba ti beno me vuluka? Na lukwikilu beno me vuluka, mpe yina na nzila ya luzabu ya mantwala ya Nzambi, yina bokilaka beno. Beno me vuluka, mpe Menga ke na kusala mulemvo, ya ke bumba beno kukondwa mvindu ntangu nionso. Mpe na yina na nzila na Mpeve mosi beno me botama kati na Mpeve-Santu, kati na ngwisani ya bakwikidi, mpe kati na ngwisani ya Mpeve-Santu, samu na kutwadisama na Mpeve, na kusalaka bidimbu, mambu ya ngitukulu.

¹³³ Na kuvungilaka, na kulandilaka na kukwenda na ntwala, na kuvungilaka kima mosi, beto ke mona yawu na mwa ntangu fioti, mu banza yawu na mutindu nionso. Mu tubaka na nge na kubokila munu na ntangu yayi, mutindu yina ve? Mu ke katuka na kutala ngunga na ntangu yayi. Kaka—kaka mpova mosi to zola diaka. Kaka... Ya ke—ya ke diaka ya kulutila fioti.

¹³⁴ Ya ke vwanda bantangu yikwa mpulusu yango, bantangu yikwa? Wapi mutindu ya mpulusu yawu kele? Na dibuundu mosi na yankaka? Kubanda... Beto baka ba-Hebreux 9:11, na mwa muniti fioti, kaka—kaka samu na kutala bantangu yikwa, kaka na minuti fioti. Beno baka Buku ya ba-Hebreux mpe beto—beto tala bantangu yikwa mpulusu yayi ke vwanda. Beno tala wapi mutindu ya mpulusu ya kele. Beto tanga ntangu yayi ba-Hebreux 9:11.

Kasi Klisto ke na kwisa mutindu nganga-Nzambi ya ntete ya bima ya mbote yina ke na kwisa, na nzila tabernacle ya kulutila nene mpe ya kulunga, yina bantu tungaka ve, ya zola kutuba ti,... (ntangu yayi ya ke mulongi mosi yayi, Paul, beno me mona)... kivinga yango kele ve... kivinga yayi;

Yandi pesaka ve menga ya bankombo to ya bangombe, kasi na menga ya yandi mosi yandi me kota mbala mosi (bantangu yikwa? Mbala mosi!) na kivinga ya santu, yandi me kuzwa... (mpulusu samu na lumingu mosi, mpulusu samu na reveil yina ke na kwiza? Wapi mutindu?)... mpulusu ya seko samu na beto.

¹³⁵ Yinki mpova yayi “Seko” zola kutuba? Kati na Klisto, na manima mu me kwikila... Muntu mosi ve lenda bokila Yesu, “Klisto,” kaka na Mpeve-Santu. Na yina ya ke na mitindu tatu ya bantu: mimpani, bakwikidi ya kati-kati, mpe bakwikidi. Kasi bayina me kwikila na Luzingu ya Kukonda nsuka, me kota na bivinga ya nganda.

¹³⁶ Beno baka tabernacle ya ntama, yinki vwandaka kima ya ntete bawu salaka? Ba kotaka na bivinga ya nganda, Bantu ya makanda. Ya kulanda vwandaka autel ya mutaku, ba sukulaka munkayulu na kive ya wolo. Ya kulanda vwandaka ba vwandaka kufwa munkayulu, mpe ba vwandaka mwangisa menga na zulu ya autel. Na yina, mbala mosi na mvula mosi, Aaron pakulamaka, oh, (na yinki?) na mananasi ya Sharon Rose, na mafuta ya ntalu yina ba vukisaka na mananasi, ba vwandaka tiamuna yawu na zulu ya yintu ya yandi, mpe ya vwandaka kulumuka tii na bansongi ya bilele ya yandi. Beto tala mutindu muntu yayi vwandaka kota na kati vwale, mbala mosi na mvula mosi, na kunataka menga samu na Mulemvo ya Masumu. Mpe na mvula mosi yandi kotaka kuna na nkawa ya yandi mpe zimbanaka yawu. Ntangu ba vutukaka samu na kubaka yawu, ya basisaka matiti mpe bafelele. Mwa nkawa yina yandi bakaka

na ntoto ya kuyuma mbala yankaka na bamvula makumi yiya, ya vwandaka kuna na kati ya Kivinga yina ya Santu! Beno tala, ntangu ba vwandaka nata menga yina ya ngwisani, menga, yandi pakulamaka. Mpe yandi vwandaka lwata bilele na mwa bangengele, na mbuma yayi grenade mpe ngunga mosi. Mpe muntu yango lendaka kutambula na mutindu ti na konso ntangu yandi vwandaka tula dikulu ya yandi na ntwala, ti ya vwandaka tambula mutindu *yayi* mpe vwandaka kutambula, ya vwandaka yimbila “Santu, santu, santu, kele Mfumu. Santu, santu, santu, kele Mfumu. Santu, santu, santu, kele Mfumu.” Oh, lala!

¹³⁷ Yinki mu ke na kutuba? Beno kuwa Yayi, Branham Tabernacle! Beno me kuzwa siansi ya beno. Na ntangu muntu mosi me pakulama na Mpeve-Santu, samu na kubaka lukumu na dibuta ya Nzambi, samu Tata kupesa yandi kisika mosi, mpe kutula yandi na kisalu awa, samu na kikuma mosi na luzingu yayi, to yina Nzambi bokilaka yandi na kusala, kutambula ya yandi fwana vwanda “Santu, santu, santu, kele Mfumu. Santu, santu, santu!”

“Oh, nge fwana baluka na lweka *yayi* mpe kuvwanda . . .”

“Santu, santu, santu, kele Mfumu.”

“Oh, nge fwana kwikila yina nionso kuluntu me tuba, *yayi*.”

¹³⁸ Kasi, “Santu, santu, santu, kele Mfumu.” Beno bika Ndinga ya Yandi kubaka kisika ya ntete, beno bika Yawu vwanda nionso samu na beno, kuna na kati, ya kuvwanda mbote-mbote na kati ya ntima ya beno! Kutambula ya beno fwana vwanda na kati ya Ndinga. “Santu, santu, santu, kele Mfumu.”

¹³⁹ “Oh, kana nge ke ndima kaka na kukwisa awa! Mu ke tuba na beno yina mu ke sala, beto ke sala organisation, beto ke kotisa nge na organisation ya beto, nge ke vwanda muntu ya nene.”

¹⁴⁰ “Santu, santu, santu, kele Mfumu. Santu, santu, santu, kele Mfumu,” beno ke landila na kukwenda na ntwala. Ya ke sala luswaswanu mosi ve yina bantu yankaka ke tuba!

¹⁴¹ “Katula ba-bande yayi! Sala *yayi*, sala *yayi*, sala *yina*, sala *yina*, yina *yankaka*.”

¹⁴² “Santu, santu, santu, kele Mfumu.” Meso ya beno ke tala kaka na Calvaire, mpe kima mosi ve ke kanga beno nzila! Mutindu ya beno ya kutambula na luzingu ya beno, beno ke tambula na Bala-bala ya Ntinu, ya kupakulama na Mafuta ya ntalu ya ya kupakulama, beno ke tambula na Kisiksa ya kulutila busantu. Fiu! Amen. Mbote mingi.

¹⁴³ Paul tubaka ti yandi kuzwaka Yawu na muntu ve. Ntangu yayi yawu yina ya me tuba, kuna na ba-Galate, na dilongi ya beto. “Ya me talisa na beto mansweki ya luzolo ya Yandi.” Yinki kele luzolo ya Yandi? “Ya me talisa na beto mansweki ya luzolo ya Yandi.” Beno yina ke na kusonika, nzila ya 9. Ntangu yayi mu

ke sala nswalu mingi samu na kuzonza yayi, samu beto me kuma na mansukinina.

¹⁴⁴ Oh, konso Mpova nionso kele kieleka . . . ? . . . Oh, konso Mpova kele pepite. Beno lenda baka Yawu mpe kulandila kaka na swemisa Yawu. Beno lenda timuna, mu lenda . . . Beno lenda baka mosi ya Bandinga yina kuna, beno nata yawu na Genèse mpe kusemisa yawu beno nata yawu kuna na Exode mpe beno semisa yawu diaka, beno lenda baka yawu kuna na Lévitique mpe kusemisa yawu diaka, mpe, ntangu beno ke kuma na Apocalypse, nionso Yina kele kaka Yesu! Amen. Beno lenda semisa yawu kaka na mutindu beno me zola, ya ke vwanda Yesu ntangu beno ke kuma—ntangu beno ke kuma na Apocalypse. Na yina, Yandi tubaka, “Mu kele Yandi yina Vwandaka, Yina Kele, mpe Yina ke Kwisa. Mu kele Nsimbulu mpe Kikanda ya David, Mbwetete ya Suka. Mu kele Alpha, Omega.” Ya zola kutuba A na Z na alphabet Grec. “Mu kele kubanda A tii na Z. MU KELE! Mu kele Nionso kati na nionso.” Ya kieleka. “Mu kele Yandi yina vwandaka zinga mpe yina kufwaka, mpe kele zinga diaka mvula na mvula. Mu ke na bafungula ya lufwa mpe difelo.” Oh, la la! Konso pepite beno ke buka awa mpe beno banda na kusemisa yawu, na kusemisaka yawu beno ke kuzwa Yesu.

¹⁴⁵ Ntangu yayi, beto ke baka mwa ntangu fioti mpe beto ke—beto ke—beto ke—beto ke, beto ke sukisa. Yinga. Na yina, yinki beto ke na kuvingila? Samu na yinki beno kele awa na lukutakanu? Samu na yinki? Samu na yinki yinza ke vumuna? Samu na yinki bombe atomique me zangamana kuna, samu na yinki ba-molécule na ba-atome? Mpe, oh, samu na yinki nionso yayi?

¹⁴⁶ Beno baka, ba-Romain 8, na mwa muniti fioti. Yinki nionso yina ke vingila? Yinki nionso yayi ke vingila? Yinki ntangu beto me kuma? Ba-Romain, kapu 8, mpe beto banda na kutanga na, oh, mu zola tuba kumi na na—. . . Beto banda na kumi na yi—. . . nzila ya 19, mpe beto ke—ke tanga yawu awa samu ya vwanda, samu ya vwanda kieleka ya lembami. Ya kieleka. Mu zaba kisika beno zola kuma kuna. Mbote mingi. Ba-Romain, kapu 8, mu ke kwikila mu ke ya kusungama ntangu yayi. Yinga, tata. Kapu 8, mpe beto banda awa na nzila ya 18. Beto banda kaka na nzila 14.

*Bantu yina nionso Mpeve ya Nzambi ke twadisaka,
kele . . . bana ya Nzambi. Ya kieleka.*

*Ya kieleka mpeve yina beno kuzwaka kele ve mpeve
yina ke kitulaka beno diaka bandondo samu na
kuvwanda diaka na boma; . . .*

¹⁴⁷ “Oh, mu ke kukiyufula kana mu lendaka kanga ntima. Oooo, kana mu lendaka kanga ntima ntangu yayi!” Kukanga ntima kima mosi ve! Kiuvu kele ve ya kuzaba kana mu ke kanga ntima,

to Yandi ke kanga ntima. Mu ke na kati ya Yandi ntangu yayi, beno me mona.

¹⁴⁸ Mbote, beno ke tuba, “Mbote, kana mu na kati ya Yandi!” Ntangu yayi beno—beno ba-Presbytérian ke tuba, “Ah, beto ke kwikilaka Yawu ntangu nionso.” Kasi luzingu ya beno ke talisa ti beno ke mutindu yina ve, kana beno ke zinga ve luzingu yina Yandi zingaka, beno ke kwikilaka Nsangu ya mbote ya mutindu mosi na yina Yandi longaka.

¹⁴⁹ Beno ke tuba, “Ah,” ba-Baptiste ke tuba, “ya kieleka, mu ke kwikilaka na lukengolo ya Seko.” Mpe beno ke basika awa mpe beno ke kunwa fumu mpe beno ke kwenda bina, mpe bakento ke zengisa bansunki ya bawu, ke tula maquillage na bizizi ya bawu mpe sala mu zaba ve yinki mutindu? Bambuma ya beno ke talisa yina beno ke kwikilaka Yawu ve.

Ntangu mu ke tuba, “Beno ke kwikilaka na kubeluka ya Kinzambi?”

“Oh, Docteur Jones tubaka ya vwandaka mutindu *yina*, ti ya vwandaka samu na bilumbu yina me luta.”

¹⁵⁰ Ntangu yayi, beno bantu ya luvunu! Yinki kele diambu na beno? Mputu ya mwana yina ba me vuna. Beno ke ntama mingi na Nsangu ya mbote ti ya ke pesa kiadi. Ba me nata beno na nzila mosi ya poto-poto mpe na fulu mosi ke pela tiya. Beno me mona awa yina Yandi me tuba? Ti, mpeve yina nionso yina ke tuba ti Yesu kwisaka ve na kati ya nzutu na ntangu yayi, kele mpeve ya yimbi. Biblia me tuba Yesu Klisto kele mutindu mosi mazono, bubu yayi, mpe kukonda nsuka. Yina Yandi tubaka na ntangu me luta, Yandi ke mutindu yina na ntangu yayi, Yandi ke mutindu yina mvula na mvula. Beno kuwa ntangu yayi.

Samu beno me yambaka ve mpeve ya bumpika samu na kuvwanda diaka na boma; kasi beno me yambaka Mpeve ya lu-... [Dibuundu me tuba, “Lukumu a bana.”—Mu.]

¹⁵¹ Ntangu yayi, na manima ya beno me baka lukumu ya bana, mbote mingi, na manima ya beno me baka lukumu ya bana. Ba me tula beno na kisika mosi, na yina beno me bakula, na manima ba me zabisa mukembu mpe ba me tula na kati ya Nzutu na mutindu ya mbote. Beno ke mwana ya bakala, ya kieleka, mwana ya kento, ntangu beno me butuka mbala ya zole, yina ke lubutuku ya beno. Kasi ntangu yayi ba me tula beno na kisika mosi.

Beto me yamba ve mpeve ya boma; kasi beto me yambaka Mpeve, beto me yambaka Mpeve ya lukumu ya bana, na yina beto ke boka, Abba, Tata. Ya zola kutuba, “Nzambi ya munu.” Mbote mingi.

Mpeve yawu mosi ke pesa kimbangi na mpeve ya beto, ti beto kele—beto kele bana ya Nzambi:

¹⁵² Wapi mutindu ya ke salaka yawu? Beno ke tuba, “Nkembo na Nzambi! Aleluya! Ya ke yangisa munu ve, mu ke mwana ya Nzambi,” mpe beno ke basika mpe ke sala mambu yina beno ke salaka? Mpeve ya Nzambi ke sala bisalu ya Nzambi.

¹⁵³ Yesu tubaka, “Yandi yina ke kwikila na Munu, yandi mpe ke sala bisalu yayi Mu ke sala.” Beno me mona? Beno me mona?

¹⁵⁴ Kana—kana—kana—kana yinti yayi ya vinu kubasika mpe kubuta nkuta ya ba-raisin, mpe yina yankaka kubasika mpe kubuta nkuta ya ba-citrouille, ya ke na kima mosi ke tambula mbote ve. Beno me mona? Ya ke dibuundu yina ba me namika, yinti ya vinu yina ba me namika, ya muntu yina ba me namika. Kana muntu mosi kele na denomination mosi, yandi ke na denomination mosi mpe ya ke kukibokila Muklisto, mpe yandi ke na Mpeve-Santu ve mpe yandi ke na Ngolo ya Nzambi ve mpe bima yayi nionso . . .

¹⁵⁵ Ntangu yayi, kana beno basika awa mpe beno ke sala mambu mutindu nkonga ya bantu yina vwandaka ya kulawuka, kaka samu beno me tuba na bandinga. Mu me monaka bampeve ya yimbi ke tuba na bandinga. Yinga, tata. Mu me monaka bawu ke bina na mpeve, mpe ke boka mpe kubasika fulu-fulu na bikobo, mpe bima yankaka, mpe nionso yina. Mu me monaka yawu. Mu ke . . . Mu ke na kutubila yawu ve. Mu ke na kutubila Mpeve ya Nzambi.

Mpeve yawu mosi ke pesa kimbangi na mpeve ya beto, ti beto kele . . . bana ya Nzambi:

Mpe kana diaka beto kele bana, bilandi; bilandi ya Nzambi, . . . bilandi kintwadi na Klisto; kana mutindu yina . . . ti beto ke mona mpasi kintwadi na yandi, ti beto lenda . . . samu na kubaka nkembo kintwadi na yandi.

Samu mu banza ti bampasi . . .

¹⁵⁶ Beno kuwa yayi. Oh, ya ke kitoko mingi!

Samu mu banza ti bampasi ya ntangu yayi lenda kufwanakana ve na nkembo yina ke monisama na beto. Na beto!

Samu bivangu me lemba na kuvungila . . .

¹⁵⁷ Ya ke na lubokilu awa, ya ke na mwa—ya ke na mwa mpova mosi kuna, mwa bisono mosi na lweka, “bivangu” mpova ya kieleka, na Grec.

. . . bivangu me lemba na kuvungila, bivangu ke na kuvungila bakumonisama ya bana ya Nzambi.

¹⁵⁸ Yinki bima nionso ke na kuvungila? Yinki bivangu nionso ke na kuvungila? Bakumonisama ya bana ya Nzambi. Ya ke na kuvungila Dibuundu na kubaka na kisika ya yawu. Nani vwandaka mwana ya Nzambi, ntangu Adam, wapi sika vwandaka kisika yandi? Ntoto. Yandi, yandi vwandaka na kisika

na zulu ya ntoto. Mutindu yina? Yandi vwandaka Elah, Elah, Elohim na ntangu yina; Yandi vwandaka Yehowa. Beno me mona? Ya zola kutuba, “Mu kele Nzambi, mpe Mu me sala bima ya fioti na nsi ya munu. Mpe Mu me pesa bawu luyalu. Mpe na kisika ya bawu, sika wapi ba ke na luyalu, kele ntoto.” Muntu vwandaka na luyalu na zulu ya ntoto. Mpe bivangu nionso ke na kuvingila bana ya Nzambi kumonisama. Oh!

Beto ke vingila kwizulu ya millenium kilumbu
yina ya nkembo,
Ntangu Mfumu ya beto ke kwisa sosa Kento ya
Yandi ya makwela ke vingila Yandi;
Oh, ntoto ke na kuboka, ke na dila samu na
kilumbu yina ya mpulusu,
Ntangu Mvulusi ya beto ke vutuka diaka na
zulu ya ntoto.

¹⁵⁹ Ya kieleka? Ke na kuvingila. Nzambi ke na kumeka kutula dibuundi ya Yandi na kisika, samu na katalisa Yandi, na kubakaka mosi yina Yandi lenda sadila mutindu yayi, na kutubaka, “Ya ke na Mpeve ya Munu ke tambula kuna na kimpwanza. Yawu yina. Ti, ti, Mu—Mu lenda sala.” Tala, baka yina yankaka awa mpe tula yandi na kisika, “Mu lenda tula yandi na kisika mosi.” Lukumu ya bana, kutula na kisika, kumonisama, kunata yandi awa mpe kusadila yandi mukembu, kutala yandi na Wanzio, kutuba na yandi kima mosi. Ntangu yayi, yandi me tuba kieleka! Ntangu yayi kana yandi ke kusala bisala-sala, ya ke sala kima mosi ve. Ve, ve, ya ke—ya ke sala kima mosi ve, beto me kuzwa mingi ya mutindu yina. Kasi mu zola kutuba—kasi mu zola kutuba bakumonisama ya bana ya Nzambi, ntangu Nzambi ke kukitalisa Yandi mosi mpe Yandi ke tinda yandi. Na yina yandi ke kwenda, mpe yina yandi ke tuba kele Kieleka. Yina yandi ke sala kele Kieleka. Yina yandi ke sala, yandi ke talisa Klisto. Wapi mutindu beno ke fundisa yandi? Na mutindu yandi ke kangama na Ndinga, kaka na Ndinga. Beno me mona, ya ke mutindu yina beno ke zaba bantu nionso, ya ke mutindu yandi ke kangama na Ndinga. “Kana ba ke tuba ve kulandila Ndinga, ya ke na Luzingu ve na kati ya bawu,” Biblia me tuba. Beno me mona? Beno bika bawu.

¹⁶⁰ Ntangu yayi beto tanga, na yawu beto—beto ke sukisa, samu ntangu ya beto me luta. Mbote mingi, na nzila ya 10, to nzila ya 9, mu zola tuba.

*Ya me talisa na beto na beto mansweki ya luzolo ya
yandi, samu na kupesa beto lukumu, kulandila bumbote
ya mabanza ya yandi:*

¹⁶¹ Yandi bakaka dibanza Yandi mosi, na ntwalla yinza kusalama. Bantu yikwa me bakula yawu? Beno me mona?

Samu na kusadila yawu . . .

¹⁶² Oh, la la, beto me kuma kisika yango diaka! Huh! Oh, beto—beto—beto sala nswalu ntangu yayi, beno me mona.

...na ntangu bantangu ke lunga...

¹⁶³ Beno ke kwikilaka na bansungi? Biblia me tuba mutindu yina, “Na nsungi ya kulunga ya bantangu.” Yinki kele kulunga ya bantangu? Ya vwandaka na nsungi ya, mbote, ya vwandaka na nsungi ya Musiku ya Moise. Ya vwandaka na nsungi ya—ya—ya Jean Baptiste. Ya vwandaka na nsungi ya Klisto. Ya vwandaka na nsungi ya organisation ya dibuundu. Ya vwandaka na nsungi ya kumwangana ya Mpeve-Santu. Ntangu yayi kele nsungi ya lukumu ya bana, yawu yina yinza ke na kuvingga, ke na kuvumuna. “Mpe na ntangu kulunga ya bantangu ke kwisa, ntangu nsungi ya kulunga ya bantangu.” Yinki kele kulunga ya bantangu? Ntangu bamvubi ke vumbuka, ntangu kimbevo ke suka, ntangu...na ntangu ntoto ya muvimba ke sukisa na kuvumuna. “Kulunga ya nsungi ya ntangu.” Beno tala mbote yayi.

Ntangu na nsungi ya kulunga ya bantangu yandi ke vukisa bima nionso kintwadi kati na Klisto,...

¹⁶⁴ Beno ke na kiese ve? Yinki mutindu Yandi ke sala yawu? Yandi ke vukisa bima nionso kintwadi kati na Nani? [Dibuundu me tuba, “Klisto.”—Mu.] Wapi mutindu beno ke kotaka na Klisto? [“Na Mpeve mosi.”] Na Mpeve mosi beto nionso me botama kati na [“Nzutu mosi”] Nzutu mosi. Mpe Nzutu yango kele Nzutu ya Nani? [“ya Klisto.”] Ba me sambisaka yawu dezia. Yandi bakaka lusambusu ya beto. Na yawu banani beto kele? “Ntangu Mu ke mona [“Menga.”] Menga, Mu ke luta na zulu ya beno.” Na ntangu nionso Yandi ke tala Nzutu, Ya me vwanda kuna, na menga. Wapi mutindu mu kele kuna? Na Mpeve-Santu. Yandi ke luta na zulu. Oh, la la!

Mpe ntangu kulunga ya nsungi ya ntangu, ti yandi ke vukisa kintwadi...bima nionso kati na Klisto, yina kele na zulu,...

¹⁶⁵ Ntangu yayi kana beno zola kuzonzila nkumbu mosi, beto banda na ntangu yayi na mwa ntangu fioti. Wapi mutindu ba ke bokila dibuta ya muvimba na Zulu? [Dibuundu me tuba, “Yesu Klisto.”—Mu.] Wapi mutindu ba ke bokila dibuta ya muvimba na ntoto? [“Yesu Klisto.”]

¹⁶⁶ Ya ke na bakento ya mbote na kati awa, ya mbote, ya mvwama, mama ya kieleka, bamama ya kieleka. Ya ke Mama Branham mosi, Mama William Branham, ya ke kento ya munu. Yandi ke vutuka na munu kintwadi na yinzo. Beno me mona, bayankaka ke vutuka na babakala ya bawu.

¹⁶⁷ Ya ke na Dibuundu mosi ya nene ya Nzambi ya moyo, Yandi me baka Nkumbu ya Yandi, Yandi me fuluka na Mpeve ya Yandi. Ya kieleka. Mu ke tuba ve...

¹⁶⁸ Mu ke fundisa ve bisalu ya mbote, mu ke fundisa ve balupitalu ya bawu mpe bima ya mbote ba ke salaka. Mu banza ti ya ke mbote, mpe ya ke masakumunu ya Nzambi na yinza yayi ya mputu, yina ke na mona mpasi. Mu ke fundisa ve bima yayi nionso yankaka ba ke na kusala. Mbote, ya ke ya kusungama. Mpe ba-organisation ya bawu ya nene mpe ba-million ya ba-dollars, ya kieleka mu ke sepela mingi kumona yawu na sika kumona ba-bar na nsongi ya bala-bala, konso ntangu. Mu ke zitisa bawu mutindu balongi yina ke telemaka na chaire.

¹⁶⁹ Kasi samu na kuvukisa bima nionso na nsuka ya nsungi, ya ke vingila bakumonisama ya bana ya Nzambi, na nsu...ti Yandi ke vukisa nionso kintwadi, na ntangu ya ke vukisa nionso kati na Klisto. Yinki kele Klisto? Bantu yikwa... Wapi mutindu beto ke kotaka kati na Yandi? Ba-Corinthien ya Ntete kapu 12, “Na Mpeve mosi beto me botama kati na Nzutu mosi, yina kele Nzutu ya Klisto, mpe beto ke na muswa ya makabu nionso mpe bima nionso ya mbote Yandi ke na yawu.” Ya kieleka? “Mpe ntoto ya muvimba ke na kuvumuna, ke boka, ke na kuvingila bakumonisama yina ntangu Klisto na Dibuundu ya Yandi ke vukana kintwadi.”

Ti...na ntangu ntangu...ya kuvukisa...nionso kati na Klisto, yina kele na zulu, mpe na ntoto; mpe ata mpe kati na yandi:...ntoto; ata mpe kati na yandi:

Na kati ya yandi...beto me kuzwa difwa,...

¹⁷⁰ Oh, Mpangi Neville, lemvokila munu samu mu me baka ntangu yayi nionso. Mu...mpova yayi “difwa.” Oh-oh-oh-oh! Oh, ya ke vwanda kaka! Oh-oh-oh-oh! Mu zaba Yandi... Yandi ke tata musumbi ya munu Mpangi. Mu kele ve... Mu banza ti mu ke kilawu ve. Mu—mu—mu ke kaka... Mu ke banza ti mu ke mutindu yina ve. Kasi, oh, la la! Yinki? “Difwa.” Beto me kuzwa difwa. Muntu mosi ke bikisila beno kima mosi. Nzambi, na ntwala yinza kusalama, bikisilaka beno kima mosi. Nkumbu ya beno ya kusonama na Buku, ti na ntangu ba ke fwa Mwana-dimeme beno kuzabana na Yawu. Oh! Beto simba yawu tii na nkokila yayi. Beto landila na kutanga yawu na mwa ntangu fioti. oh, la la, la la! Wapi mutindu beto ke kuma na nzila ya 3 na nkokila yayi, to na kapu 3? Beto me mona ve banzila yiya to tanu ya yayi. Ntangu yayi beto zola kuma na nsuka, kuna, mu ke tanga yawu kaka kukondwa kuyika yankaka.

Kati na yandi diaka beto me kuzwa difwa, na kuvwandaka...

¹⁷¹ Yinki? Wapi mutindu beto ke kuzwa difwa yayi awa? Wapi mutindu beto ke kuzwa yawu? Samu beto me tambula mbote-mbote? Wapi mutindu beto ke kuzwa difwa yayi? Samu ba zabaka beto na ntwala. Amen. Fiu! Mpangi ya munu ya Arminien, mu zaba ti ya ke mpasi mingi na kuwa. Mu ke na dibanza ya kulwadisa ve, kasi ya ke sala munu mbote mingi

na kuzaba ti ya . . . Beno—beno—beno me kuzwa yawu, beno me kuzwa yawu, mpangi-bakala, mbote mingi. Kasi beno ke mona yawu ve. Beno me kuzwa yawu kaka. Beno me mona? Nionso ke tambula mbote samu na beno, beno me mona, nionso ke tambula mbote samu na beno. Beno me mona? Kasi, oh, kasi ya ke mbote mingi na kutala yawu. Yinga. Kaka mutindu Mpangi Neville tubaka samu na nkinzi ya foraine, mazono, “Beno baka zune mosi mpe beno zunga yawu samu na kutala yina beno ke na yawu.” Yinga, tata. Yayi me fwanakana na yawu. Mpeve-Santu ya Nzambi kele zune ya beto samu na kutuba na beto yina beto ke na yawu. Beno me mona?

¹⁷² Beno me mona, difwa mosi. Oh, la la! “Na kuvwandaka . . .” Wapi mutindu ya difwa?

. . . na mutindu ba zabaka beto na ntwala kulandila
mabanza ya muntu yina salaka bima nionso landila
ndongisila ya luzolo ya yandi:

¹⁷³ Ntangu Yandi vwandaka . . . na ntwala Yandi kuvwanda Tata, na ntwala Yandi kuvwanda Nzambi, na ntwala Yandi kuvwanda Mvulusi, na ntwala Yandi kuvwanda Munganga, na ntwala ya nionso yayi, Yandi zabaka na ntwala, tulaka Nkumbu ya Mwana-dimeme na Buku, ya talaka na kati ya ntangu na nzila ya luzabu ya Yandi ya mantwala mpe monaka nkumbu ya beno, mpe tulaka yawu diaka kuna. Yinki ya kele? Mpe na manima ya mwa ntangu fioti beto me kwisa na yinza, beto me butuka na bibuti ya bansumuki; beto ke tambula na yinza yayi, beno zaba. Kima ya ntete beno zaba, mutindu mwa Juif yina na mbombo mutindu ndobo, Paul, beno zaba, mpe—mpe yandi vwandaka lungisa kisalu ya yandi, mpe, kima ya ntete, Kima mosi tubaka, “Hé, hé, hé, hé, hé!”

Beno ke tuba, “Oh, Abba, Tata!”

¹⁷⁴ Tala beto me banda na kukwisa, beno me mona. Ya zabaka beto na ntwala samu na difwa ya beto kati na Yandi, yina ba zabaka na ntwala samu na beto. Beno me mona, beto bakaka difwa na ntwala yinza kusalama. Beno me mona? Oh! Na yina na mabanza ya Yandi Mosi samu na kusala luzolo ya mbote ya Yandi Mosi, ya kieleka, samu na kuvwanda Nzambi mpe Mvulusi.

Kati na yandi diaka, na manima ya beno me kuwa
ndinga ya kieleka, . . .

¹⁷⁵ Mpe Nani kele Kieleka? Yesu kele Kieleka, Kieleka ya Nsangu ya mbote. Yinki Nsangu ya mbote? Ya ke kaka na Nsangu ya mbote mosi. Ba-Galate 1, me tuba, “Kana Wanzio mosi me longa nsangu ya mbote yankaka, yandi vwanda ya kusinga.” Yayi ke Nsangu ya mbote, Nsangu ya mbote ya mpulusu ya beno; yankaka ve, ya ke na yankaka ve. “Ba me pesa beno nkumbu yankaka ve—ve na nsi ya Zulu na nzila na yawu beno fwana yuluka.” Kasi na Nkumbu ya nani? [Dibuundu me tuba, “Mfumu Yesu Klisto.”—Mu.] Oh, la la!

*...kati na yandi . . . na manima beno me kwikila, beno
me baka kidimbu . . .*

¹⁷⁶ Oh, “Na manima beno me kwikila!” Yinki mutindu beto lenda baka yawu kaka na nswalu nionso, mpangi-bakala? Beto simba yawu tii na nkokila yayi, yinki beno me tuba? Oh, la la! Mu—mu lenda kwenda kaka ntama mungi—mungi ve. Beto simba yawu tii na nkokila yayi. Mu lenda ve kubika mpova yayi “me baka kidimbu,” wapi mutindu beno ke kota kuna, beno me mona.

¹⁷⁷ Difwa na nzila ya luzabu ya mantwala. Mu bakaka difwa ya kima mosi. Yinki difwa? Ya fwanaka vwanda na muntu mosi kubikila munu difwa mosi. Tala, beno ke tuba, “Yesu bikilaka munu difwa mosi.” Beno me lemovokila munu? Yesu bikilaka munu difwa ata fioti ve, Yesu bikilaka munu difwa ata fioti ve; Yandi kulumukaka kaka samu na kufuta ntalu ya difwa ya beno, me natila beno difwa ya beno. Kasi ba tulaka nkumbu ya beno na Buku ya Luzingu ya Mwana-dimeme na ntwala kusalama ya yinza. Nzambi pesaka beno difwa ya beno. Difwa ya beno vwandaka ntete. Yesu kwisaka kaka . . . Mingi, tala mutindu ba kemekaka na kusala yawu, “Nzambi tubaka, ‘Mbote, ya ke na bantu mingi me zimbana. Muntu mosi ke kuvuluka, na yawu Mu ke kulumusa Yesu kuna mpe mbala yankaka Yandi ke . . . muntu ke vwanda na mpasi na ntima, mpe yandi ke zaba yina Mu me sala mpe yandi ke vuluka.’” Oh, mawa! Mu ke twadisa bureau ya munu mutindu yina ve, na kutala ya ke na bantangu mu ke twadisaka yawu mbote ve. Beno me mona? Mu—mu lendaka sala mutindu yina ve. Yinki diambu samu na Nzambi?

¹⁷⁸ Nzambi na luzabu ya Yandi ya mantwala, monaka kieleka nani lendaka vuluka mpe nani lendaka vuluka ve, Yandi fidisaka Yesu samu na kuvulusa bayina Yandi ponaka ntete. Paul tubaka ve, na banzila tanu na manima ya yayi, ti “Yandi ponaka beto kati na Yandi ata mpe na ntwala yinza kuvwanda”? Yawu yina difwa ya beto. Nzambi ponaka beto, mpe bikaka Yesu kukwisa samu na kufuta ntalu. Samu na yinki? Yandi tiamunaka Menga ya Yandi, samu ba tangila beto ata disumu mosi ve. Beno ke sala kima mosi ve. Kasi kana beno . . .

¹⁷⁹ “Yandi yina ke sumuka na luzolo na manima ya yandi me kuyamba luzabu ya Kieleka, ya ke vwanda diaka ve na munkayulu.”

¹⁸⁰ Ntangu yayi, mpe ya ke kisika yina beno ke telema diaka, mpe ke tuba, “Yinki nge ke tuba samu na yayi, Mpangi Branham?”

¹⁸¹ Kasi beno bambuka moyo, beno me mona, “yina me kuyamba luzabu ya Kieleka.” Ba me kuyambaka Kieleka ata fioti ve, ba me yambaka kaka luzabu ya Yawu. Beno me mona? Ya ke mpasi samu na bayina me kuzwaka ntete nsemo, Mpeve-Santu, ngolo ya Ndinga ya mbote. Mutindu bakwikidi yina ya ndilu kuna. Bantu mungi me kusonikila munu mikanda samu na yawu.

¹⁸² Bakwikidi yina ya ndilu tambulaka tii kuna, Josué na Caleb kwendaka kuna. Samu na yinki? Ntangu yayi beto ke bokila yawu Mpeve-Santu, yina kuna. Bawu yayi *awa*. To na zulu *awa*, ba ke tuba ti *yayi* ke Mpeve-Santu, mpe bawu kele *awa*, beno me mona. Ya kele kuna nsilulu kele, ya kele *kuna*. “Mbote, kana bawu tinda bamilangididi, mosi na konso dibuta, na yina mabuta ya beto nionso ke zaba yina kele difwa ya beto, sika wapi ba ke tula bantu nionso kuna, sika beto ke vwanda.’ Na yawu, mu ke tinda bamilangididi.”

¹⁸³ Bawu nionso kwendaka kuna, “Oh, la la! Ve. Ba ke bokila beto ba-exalté, na ntangu yina. Ve, huh-uh, beto lendaka sala yawu ve.” Beno me mona?

¹⁸⁴ Josué na Caleb tubaka, “Mu ke mona yina ya me fwanana na yawu.” Na yawu ba kwisaka kuna mpe talaka yina vwandaka salama. Oh, la la, bawu tandaka diboko kuna mpe bawu bukaka nkuta ya ba-raisin mpe bawu vutukaka. Bawu tubaka, “Beno tala, ya ke kitoko, ya ke kitoko mingi! Tala, beno baka ndambu ya yawu, ya ke mbote mingi!”

¹⁸⁵ “Oh, ya ke mbote, kasi, oh, beno tala bantu yina ya nene... Oh, beto lenda ve. Kutalemina ba-denomination yina nionso, bima yina nionso ya nene? Oh, ya ke yimbi mingi, beto lenda sala yawu ve. Ve, tata! Ya vwanda nani, beto lenda ve. Ve, tata.” Mpe bawu bandaka na kutuba, “Oh, beto vutuka na banzungu ya misuni ya Egypte. Kulutila mbote beto bikala kuna. Beto lenda ve, nzila yayi kele ya fioti mingi. Beto zaba ti beto lenda ve kusala *yawu*, beto lenda ve kusala *yina*.”

¹⁸⁶ Kiboba yayi ya Caleb tubaka, “Beno vwanda swi, beno nionso!” Josué tubaka, “Beno kanga bayinwa ya beno, beno nionso! Beno bika mu tuba kima mosi.”

¹⁸⁷ “Oh, yàyá, yàyá, yàyá, beto lenda sala yawu ve! Oh, beto lenda ve. Mbote, Kana mu fwana yambula kimvuka ya munu ya bansaka ya bakalati, Mpangi Branham! Kana mu fwana yambula bansuki ya munu kukula mutindu kento yina ya kiboba, mu zaba ve yina mu lenda sala. Kana mu fwana katula mwa bakupe, mu—mu—mu, oh, la la, mu lenda ve, beno zaba. Mpe kana mu ke yambula kunwa fumu, kana mu fwana sala yawu!” Nge mputu ya mbandu ya mpulusu. Yinga. “Mu lenda sala yawu ve.”

¹⁸⁸ Josué tubaka, “Oh, ya ke mbote. Aleluya! Beto lenda baka yawu.” Yinki ya vwandaka? Ba vwandaka tala bambanza ya nene yina vwandaka ya kutunga na bikaka ya ngolo. Mpe Josué na Caleb vwandaka tala nsilulu yina Nzambi salaka. Beno bikala na Ndinga, ata nge kele nani. Beno bikala na Ndinga!

¹⁸⁹ Samu Pierre tubaka, “Beno balula bantima ya beno, beno nionso, mpe beno baka mbotika na Nkumbu ya Yesu Klisto samu na mulemvo ya masumu ya beno, samu nsilulu kele samu na beno,” (yinki Yinsi ya nsilulu?) “mpe samu na bana ya beno,

mutindu mosi mpe na bayina nionso kele ntama, ya mingi mpe Mfumu Nzambi ya beto ke bokila.”

¹⁹⁰ Beno bika ve ti yayi kulwadisa beno, mu ke sukisa, beno lemvokila munu. Beno me mona? Beno ba-Pèlerin de la Sainteté na ba-Nazaréen, beno me kwisa tii na kusantisama, beno me kwisa tii awa na kisika yina beno me mona mpe ba-raisin, na yina beno me vutuka na manima. Beno me mona yina salamaka? Yawu yina kele diambu, beno me tambula ve tii na yinsi. Beno talisa na munu Nazaréen à Pèlerin de la Sainteté mosi, to mosi ya bayina kele ntoto bubu yayi, yina ke na ba-campagne ya nene ya kubeluka ya nzutu na bidimbu mpe mambu ya ngitukulu. Beno talisa munu muntu mosi. Beno me mesana na Egypte, beno me vutuka na banzungu ya ba-ayi. Beno me suka na Kadès-Barnéa. ya kieleka.

¹⁹¹ Beno tala, mpe bima bika mu talisa na beno, na ba-Hebreux kapu 6. “Samu ya kele mpasi samu na bayina me kuzwaka ntete nsemo,” beno me zaba yawu mbote mingi. Kana beno me zaba yawu ve, beno me zaba yawu ntangu yayi. Beno me mona? “Mpe bayina kuzwaka, mpemekaka makabu ya Mazulu.”

¹⁹² Mekaka, beno me mona. Bantu ke kwendaka na yinzon-Nzambi, mpe ke vwanda kuna mpe ba ke tuba, “Beno zaba, ba, ba lendaka vwanda ya kusungama. Mbala yankaka ya ke ya kusungama. Ya lendaka vwanda mutindu mosi, kasi mu ke tuba na beno, oh, ya ke lomba lukwikilu ya mingi samu na kusala yawu.”

¹⁹³ “Mekaka makabu ya Mazulu, mpe ba me vweza Menga ya ngwisani ‘kima ya kukondwa busantu,’ yina vwandaka ya kusantisama.”

¹⁹⁴ Mutindu mulongi mosi, mama ya yandi tindaka yandi kisika mosi kuna. Yandi tubaka, “Mu me kuzwa lubokilu samu na kuvwanda kisadi ya Mfumu.”

¹⁹⁵ “Mbote mingi. Kima ya ntete mu fwana sala kele kusukula bilele, cheri, mpe mu ke tinda nge samu na kulonguka.” Kima ya kulutila yimbi ya me salaka ntete ve. Ya ke mbote. Ba ke katula nionso yina Nzambi mekaka na kutula na kati ya yandi. Na yina, beno tala ntangu yayi.

¹⁹⁶ “Samu kana beto me sumuka na luzolo, disumu ya luzolo na manima ya beto me kuyamba luzabu ya Kieleka, luzabu. Beno tala yawu na Masonuku mpe beno ke zaba ti Biblia me tuba Yandi kele mutindu mosi mazono, bubu yayi, mpe kukondwa nsuka. Kumona Yawu, ya ke luzabu ya Kieleka. Kumona yawu, mpe beto pesa yawu mukongo, mpe beto vweza Menga ya ngwisani...”

¹⁹⁷ Muntu mosi ke tuba, “Oh, yinga, mu ke kwikilaka na-na Nzambi.” Mbote mingi, beno me tula dikulu ya beno ya ntete.

¹⁹⁸ “Ya kieleka, mu ke kwikilaka na kusantisama.” Mbote mingi, beno kele na ndilu, beno me kwisa tii awa beno me kubama samu na kuzwa Mpeve-Santu. Kasi beno ke tala kuna mpe ke tuba, “Mu—mu—mu zaba yawu ve. Kana mu fwana sala mutindu... Ve. Mu zaba ve. Beno zaba yinki mutindu ba ke bokilaka bantu yina? Uh-huh, mu zaba ve ti mu lendaka sala yawu to ve. Ve, mu ke kwikila ti mu ke kwenda kaka kuna mpe mu ke kuma mosi ya....?” Beno me mona? Beno me mona?

¹⁹⁹ Mpe zaba yinki ke salama? Yandi tubaka, “Ya ke mpasi samu na bawu na kukota.” Na disumu ya bawu bawu lutisaka kilumbu ya bawu ya lemvo. Biblia me tuba mutindu yina. Mu zaba ti ya ke sala mpasi, kasi Biblia me tuba, “Bawumekaka makabu ya Mazulu, mpe vwezaka Menga ya ngwisani na nzila ya yawu...”

²⁰⁰ Ba ke tuba, “Mu ke kwikila na kusantisama, na luzingu ya mbote, ya kukondwa mvindu, mpe ya busantu.”

²⁰¹ Ya kieleka, kasi beno, ntangu beno me mona mbotika ya Mpeve-Santu, mpe mbotika na bima yankaka nionso na kati ya Biblia, mpe yinki beno me sala? Beno me vweza Menga ya ngwisani na nzila ya yawu beno me santisama, “kima ya kukondwa busantu.” Yinki na kati ya yinza me zangula beno tii awa, nkundi? Yinki....? Yinki me kanga beno samu na kuvwanda nsumuki ya nsi mingi? Yinki me basisa disumu na luzingu ya beno, mpe kunwa makaya mpe kunwa malafu, mpe bakento mpe bima yankaka na luzingu ya beno, yina lendaka vwanda ve? Yinki salaka yawu? Menga ya ngwisani! Na manima beno me kwisa pene-pene mingi samu na kumeka ba-raisin na Yinsi yina yankaka, mpe beno ke na nsoni ya Nsangu ya mbote, beno ke na boma ya denomination ya beno! Nzambi kuwa beno mawa! Yinga, tata. “Me vweza Menga ya ngwisani ‘kima ya kukondwa busantu,’ mpe beno ke samula bisalu ya lemvo. Ya ke mpasi samu na yandi na kukota na Yinsi.”

²⁰² Yinki salamaka? Mu ke yufula beno. Ntangu yayi, mu ke typologue, mpe muntu yina me zaba Biblia kele typologue. Mosi ya bantu yina kotaka na yinsi ya nsilulu? Ata mosi ve. Nani salaka yawu, nani kwendaka kuna? Bayina kwendaka kuna ntete, bawu vutukaka mpe tubaka, “Beto lenda baka yawu, beto lenda kuzwa Mpeve-Santu samu Nzambi me tuba mutindu yina! Pierre tubaka na Kilumbu ya Pantekote, kana mu ‘balula ntima mpe mu baka mbotika na Nkumbu ya Yesu Klisto,’ mu ke kuzwa Mpeve-Santu, nsilulu kele samu na munu. Mu ke zola kusala yawu. Ya ke ya munu, nsilulu ke ya munu.” Beno me bakula yawu? “Ntangu yayi nsilulu kele ya munu. Mu ke kuzwa yawu, ya ke ya munu. Ya kieleka ya ke ya munu.” Ba vwandaka bawu mosi kaka.

²⁰³ “Oh,” beno ke tuba, “kasi, Mpangi Branham, na mvumbukulu!” Ba ke vwanda kuna ve. “Oh, ba ke vwanda kuna ve?” Ve, tata. Yesu tubaka.

²⁰⁴ Bawu tubaka, “Nge ke kukimisa Nge mosi nene mutindu mosi na Moise, mpe Nge tubaka ti Nge vwandaka, Nge ‘monaka Abraham.’ Mpe yandi tubaka, “Mpe—mpe—mpe—mpe Abraham me kufwaka! Tala, Nge kele ve—Nge kele ve na bamvula kulutila makumi tanu, mpe Nge ke tuba ti Nge monaka Abraham?”

²⁰⁵ Yandi tubaka, “Na ntawala Abraham kuvwanda, MU KELE.” Oh, la la! “MU KELE,” Nzambi ya Kukonda nsuka, ntangu nionso bubu yayi. Mazono ve, mbasi ve, “MU KELE.” Beno me mona? Ntangu nionso Nzambi ya bubu yayi, Elohim, “MU KELE.” Na manima bawu bakaka . . . Ba zolaka kufwa Yandi na ntangu yina.

²⁰⁶ Yandi tubaka, “Mbote, batata ya beto kudiaka mana na ntoto ya kuyuma na bamvula makumi yiya. Nzambi kulumusaka mampa mbala mosi na Zulu mpe disaka bawu. Bawu kwendaka na dibuundu mpe bawu vwandaka bandimi ya mbote ya dibuundu na bamvula makumi yiya. Kiboba ya Mama ya munu kufwaka na kati ya dibuundu yayi,” mpe bima ya mutindu yina. “Batata ya munu kudiaka mana na ntoto ya kuyuma na bamvula makumi yiya.”

²⁰⁷ Mpe Yesu tubaka, “Mpe bawu nionso kufwaka.” *Kufwa* zola kutuba “kukabwana ya Kukonda nsuka.” “Bawu nionso kufwaka. Kasi Mu ke tuba na beno, ti Mu ke Dimpa ya Luzingu yina me katuka na Nzambi kuna na Zulu. Kana muntu me kudia Dimpa yayi ya Mpeve, yandi ke kuzwa Luzingu ya Kukonda nsuka mpe yandi lenda kufwa ve. Mpe Mu ke vumbula yandi na kilumbu ya nsuka.” Oh, mpangi, Yandi ke mbote ve?

Yandi ke mbote ve, mbote ve, mbote ve, mbote ve?

Yesu Mfumu ya beto kele mbote ve?

Meso ya munu me mona, makutu me kuwa, mu
me tanga yawu na kati ya Ndinga ya Nzambi;

Yesu Mfumu ya beto kele mbote ve?

²⁰⁸ Ya kieleka? Beto ke mona Mpeve ya Yandi ya kuswasikisa ke tambula na kati ya beto. Beto ke mona Yandi ke sala bimangu na bidimbu mpe mambu ya ngitukulu. Beto ke kuwa Yawu ya me sonama na kati ya Ndinga awa, beno ke mona Yawu ke siamisa mbala mosi kuna. Oh, la la!

Meso ya munu me mona, makutu me kuwa, mu
me tanga yawu na kati ya Ndinga ya Nzambi;
Yesu Mfumu ya munu kele mbote ve?

²⁰⁹ Na minuti zole, to tatu, ya ke vwanda na kisalu ya mbotika ya masa awa. Mpe ntangu yayi bayina ke baka mbotika, bakento kukwenda na lweka *yayi*, mpe babakala na lweka *yayi*. Mpe ntangu yayi babakala na diboko ya munu ya kimama, na lweka *yayi*. Mpe bakento kukwenda na lweka *yayi*. Bampangi ya bakento ke vingila beno kuna na bilele ba me kukubika. Mpe kana bakala mosi to kento mosi awa na suka *yayi*, yina me ndima

ti beno me kwikila na Ndinga ya Nzambi, mpe beno ke kwikila ti Nzambi ke simbaka nsilulu ya Yandi, ti kana muntu mosi me balula ntima kimakulu na masumu ya yandi nionso . . . Ntangu yayi, Menga me sala ntete kima ve. Ve, ya ke lukwikelu ya beno na Nzambi. Mpe Nzambi ke na kubokila, kaka, “Fuuu, fuuu, fuuu!” ke na kubokila nge, yawu yina ke na kusalama na ntangu yayi, “Fuuu, fuuu!”

“Mu me botamaka ata fioti ve.”

“Fuuu, fuuu!”

“Mbote, mbote, kana mu lenda kubanda kaka mu ke sala mambu ya luswaswanu.”

“Fuuu!” Yina, yawu yina diambu, beno banda, na manima—na manima beno sala mambu ya luswaswanu na manima ya kubanda. Beno me mona? Beno fwana baluka, samu na kubanda, beno me mona.

Beno ke tuba, “mbote, mu—mu—mu me monaka yawu mutindu yina ata fioti ve.”

²¹⁰ Mbote, mpangi ya luzolo, mu zola ti nge talisa na munu Disonuku mosi kisika muntu mosi . . . Yawu yina mu ke yufulaka na balongi kubanda bamvula makumi tatu na mosi na yinza ya muvimba, na ntewala ya ba-évéque mpe bayankaka, kisika muntu mosi, muntu mosi bakaka mbotika na mutindu yankaka na kisika ya Nkumbu ya Yesu Klisto. Mpe muntu yina nionso me bakaka ve mbotika na Nkumbu ya Yesu, fwana kwisa mpe yandi baka diaka mbotika na Nkumbu.

²¹¹ Nzambi vwandaka kaka na Nkumbu mosi, mpe Nkumbu ya Yandi kele Yesu. Yina vwandaka Mwana ya Yandi, Yandi bakaka Nkumbu ya Mwana ya Yandi. Nzambi! Ntangu yayi, Yesu, nzutu vwandaka muntu. Beto zaba yawu. Yina vwandaka Mwana ya Nzambi yina vwandaka ya kufika na kivudi. Ntangu yayi beto ke kwikilaka ve na bumosi, mutindu bantu ke tubaka ti Nzambi kele mutindu musapi ya beno. Beto ke kwikilaka na bisa—. . . bisalu tatu ya Nzambi. Bisalu tatu ya Nzambi, Nzambi monisamaka na kati ya yawu. Kasi Nzambi kele mosi. Beno me mona? Ya kieleka. Beto ke kwikilaka ve . . . Beto ke kwikilaka ve . . . Beto ke kwikilaka ve na—na . . . Bika mu tuba yawu mutindu yayi, beto ke kwikilaka ti Nzambi zingaka na kati ya bisalu tatu. Yandi vwandaka na kisalu na zulu ya ntoto na ntangu mosi.

²¹² Ntangu yayi, beno bakento beno kwenda na lweka *yayi*, mpe beno babakala beno kwenda na lweka *yayi*, bayina zola kukubama. Mpe Ba ke na kukubika kisalu ya mbotika na ntangu yayi.

²¹³ Mpe, ntangu yayi, Nzambi vwandaka na bisalu tatu. Mosi ba bokilaka yawu Butata, to kisalu ya Tata; yankaka ba bokilaka yawu Bumwana; mpe yina yankaka ba bokilaka yawu Mpeve-

Santu. Ntangu yayi, bubu yayi, yinki—yinki kisalu Tata ke na kusala bubu yayi? [Dibuundu me tuba, “Mpeve-Santu.”—Mu.] Mpeve-Santu. Nani Yandi vwandaka na bilumbu me luta? [“Yesu.”] Yesu. Nani Yandi vwandaka na bilumbu yina na ntwala? [“Tata.”] Kasi ya vwandaka kaka Nzambi mosi! Ya kieleka? Yandi kele Tata, Mwana, mpe Mpeve-Santu. Bawu tatu, bisalu yina tatu ya Nzambi mosi. Nzambi mosi!

²¹⁴ Kasi ntangu yayi, Tata kele nkumbu ve, ya kieleka? Mu zola kuyufula beno. Ntangu yayi mu zola pesa beno Matthieu 28:19, kisika Yesu tubaka, “Beno kwenda bisika nionso, beno longa na bayinsi nionso, beno botika bawu na Nkumbu,” (N-k-u-m-b-u) “Nkumbu ya Tata . . .”

²¹⁵ Ntangu yayi mu zola mona wapi mutindu beno zaba mbote Masonuku ya beno. Beno tuba na munu wapi ntangu mu me basika na nzila. Mpe Yandi tubaka na bawu, “Beno kwenda na yinza ya muvimba, beno longa Nsangu ya mbote na bantu nionso. Yandi yina ke kwikila mpe ke baka mbotika yandi ke vuluka. Yandi yina ke kwikila ve yandi ke fundisama. Bidimbu yayi ke landa bayina ke kwikila. Na Nkumbu ya Munu ba ke basisa bampeve ya yimbi,” (nionso yayi kele ya kieleka?) “ba ke tuba bandinga ya malu-malu, ba ke simba banioka.” Ntangu yayi Mu ke tangila beno, Matthieu . . .

²¹⁶ Beno kuwa ntangu yayi. Mu ke yufula konso muntu yina ya masolo. Ntangu yayi ya ke na ba-bande, yayi ke kwenda na yinza ya muvimba. Mu ke yufula konso muntu yina ya masolo na kukwisa natila munu konso bisono ya Masonuku, konso bisono ya . . . to Masonuku ve, konso bisono ya Masonuku to konso masolo yina, konso nzila yina ya masolo yina me talisa ti Protestant mosi, konso muntu yina me bakaka mbotika na nkumbu ya “Tata, Mwana, Mpeve-Santu” tii kuna dibuundu ya Catholique yawu na Concil ya Nicée. Ntangu yayi ya ke na ba-bande, ya ke kwenda na yinza ya muvimba, ba me tendula yawu na bandinga ya luswaswanu makumi tatu na sambwadi. Mu me kubama na kuzabisa beno mubu na mbongo ya munu. Ya kieleka. “Tata, Mwana, mpe Mpeve-Santu” kele dogme ya luvunu ya Catholique, mpe ya ke mbotika ya Baklisto ve. Ya kieleka! Luther bakaka yawu na dibuundu ya Catholique, na catechisme, Wesley ndimaka yawu mpe yawu landila na kutambula. Kasi yayi ke kilumbu ya kumonisama ya bana ya Nzambi, ntangu masweki yina vwandaka ya kubumba na ntwala yinza kusalama ke monisama. Ngunga yango yawu yayi. Ya kieleka.

²¹⁷ Beno bambuka moyo, ya ke ata fioti ve na muntu mosi na kati ya Biblia yina me bakaka mbotika na nkumbu ya “Tata, Mwana, Mpeve-Santu.” Na bamvula nkama tatu na manima ya lufwa ya ntumwa ya nsuka, ya vwandaka na muntu ve yina bakaka mbotika na nkumbu ya “Tata, Mwana, Mpeve-Santu.” Ba vwandaka . . . Mu me tangaka nionso zole *Batata Na Ntwala*

Ya Nicée, Concile Ya Nicée, mpe kubanda kuna bawu salaka organisation na yina ba ke bokila “église Chrétienne universelle” mpe salaka organisation mpe tumaka bantu nionso na ngolo na kukota kuna, ya vwandaka dibuundu ya Catholique. Mpova yayi *catholique* zola kutuba “universel,” église Chrétienne universelle, ya yinza ya muvimba, dibuundu mosi kaka yina ke vwindwa na yinza ya muvimba. Mpe Buklisto yayi, bawu tumaka bantu na ngolo na kukota kuna. Ya ke kuna bawu ndimaka, bawu katulaka Venus mpe tulaka Marie. Bawu katulaka Paul . . . to Jupiter, mpe tulaka Paul. Ya ke kaka kimuppani! Ya kieleka. Dibuundu ya Catholique basikaka kuna, mpe na manima ya bamvula nkama tanu . . .

²¹⁸ Ba ke na *Ben Hur* ya kunamika kuna, na Louisville na ntangu yayi. Ba vwandaka na *Misiku Kumi* ntama mingi ve. Mu zola ti kilumbu mosi, kana ya lendaka salama, bawu namika bamvula nkama kumi na tanu ya bambandu ya mudidi. Mu zola ti bawu namika yawu kuna. Bamvula nkama kumi na tanu bampasi ya mimpani, na ntangu ba vwandaka tuma bawu na ngolo mpe vwindaka kufwa bawu, vwindaka kufwa bawu kukondwa mpasi, vwindaka diembika bawu. Ba vwindaka kanga ngombe mosi ya bakala na diboko yayi mpe ngombe yankaka ya bakala na diboko yina yankaka, mpe vwindaka tuma bawu na ngolo na kupesa baiser na kulunsi to vwindaka nata mosi na lweka yayi to na lweka yankaka. Mu tulaka diboko ya munu, na ntangu mu vwindaka na Suisse, na manima ya makunzi yina kisika ba vwindaka tula bawu mpe vwindaka zenga baludimi ya bawu mpe vwindaka bokila bawu bandoki mpe nionso yina. Kieleka ya ke mutindu yina. Ya kieleka!

²¹⁹ Mpe mpeve yina mosi kele bubu yayi. Ya ke kaka musiku ke kanga yawu nzila. Beno vingila ya baka kimpwanza ya yawu. Biblia me tuba mutindu yina. Beno vingila ya talisa batinta ya yawu, yawu bawu luyalu. Mbala yankaka beno ke pona yawu ntama mingi ve, na mutindu mu me zaba. Beno me mona? Ya ke, ya ke kwisa. Ya ke na mutindu ya kukanga yawu nzila ve. Ya ke kwisa kaka. Ya kieleka. Ya ke kwisa kaka, ya ke kwisa. Na yawu ntangu ya ke kwisa, beno sala keba. Kasi, mpangi, beno lenda zaba kima yayi, mu me zaba na Nani mu me kwikilaka. Aleluya! Beno landila na kukwenda na ntwala. Beno me mona. Yawu yina.

²²⁰ Na ntangu mosi ntangu—ntangu nsoniki, ntangu mu tubaka na nsoniki ya Lam- . . . Biblia Lamsa-Lamsa, ntangu yandi talaka mpe monaka kidimbu yina ya Nzambi, kieleka kaka mutindu yina, na mwa ba-point tatu na katyi ya yawu, mu tubaka, “Yinki yina?”

Yandi tubaka, “Yina kele Nzambi na katyi ya bisalu tatu.”

Mu tubaka, “Mumbandu Tata, Mwana, mpe Mpeve-Santu?”

Yandi talaka munu. Yandi tubaka, “Nge ke kwikilaka yawu?”

Mpe mu tubaka, “Yinga, tata.”

²²¹ Yandi tubaka, “Mu monaka kuswasikisa yina ya mabanza na nkokila yina, mu banzaka ti nge vwandaka profete ya Mfumu.” Yandi tubaka, “Nzambi kusakumuna ntima ya nge.” Yandi ziungaka munu na diboko ya yandi, yandi tubaka, “Ntangu yayi mu me zaba yawu.” Yandi tubaka, “Ba-Américain me zaba yawu ve.” Yandi tubaka, “Ba me zaba mpe kima mosi ve.” Yandi tubaka, “Ba ke meka na kubaka Buku ya Esete mpe ke sala Yawu Buku ya Wesete. Ba me zaba mpe ve Biblia ya bawu.” Yandi tubaka, “Ya ke na Nkumbu yankaka ve ba me pesa na nsi ya Zulu, Nkumbu yankaka ve, samu bantu nionso bakaka mbotika na Nkumbu ya Yesu Klisto. Ya ke na kima ya mutindu yina ve mutindu bantu tatu na Nzambi mosi.” Mpe ya ke Mpangi Lamsa, Docteur Lamsa, mubangudi ya Biblia Lamsa, yina ke nkundi ya luzolo ya Eisenhower mpe ba-diplomate nionso ya nene ya yinza, mpe bima yankaka, yandi ziungaka munu na maboko ya yandi, yandi tubaka, “Kilumbu mosi ba ke kufwa nge samu na yawu. Kasi,” yandi tubaka, “beno bambuka moyo, bantu yina nionso ke kufwa samu na kikuma mosi.”

²²² Mu ke zola vwanda mutindu kiboba yayi Pierre ntangu yandi vwandaka na boloko. Ya vwandaka mwana-bakala mosi ya leke na kati kuna mpe yandi vwandaka na kiadi mingi. Mpe yandi tubaka, “Oh, yinki kele diambu?”

Yandi tubaka, “Nge zaba ti ba ke kufwa nge?”

Pierre tubaka, “Yinga.”

Yandi tubaka, “Mbote, ba me kubama samu na kufwa nge bubu yayi.”

Yandi tubaka, “Yinga.”

Yandi tubaka, “Mbote, ba ke—ba ke . . . nge ke na boma?”

Yandi tubaka, “Ve.”

Yandi tubaka, “Nge fwana vwanda mosi ya bayina ba ke bokilaka Baklisto.”

Yandi tubaka, “Yinga.”

Yandi tubaka, “Yinki nge salaka?”

²²³ Mpe yandi tubaka na yandi, yandi vwandaka mpe telaka yandi disolo. Mpe mutindu ya vwandaka landila na kutuba, yandi kumaka na nsuka ya disolo ya yandi, yandi tubaka, “Mpe mu zolaka vwanda na kimpwanza na suka yayi. Mu zolaka kwenda kukuma mosi ya ba-denomination ya bawu mpe kulandila na kuzinga, nge me mona. Mu zolaka vwanda na kimpwanza. Kasi mu bandaka na kubasika na mwelo ya mbanza, mpe mu monaka Muntu mosi ke kwisa, mpe kotaka. Mu zabaka Nani Yandi vwandaka. Mu tubaka, ‘Mfumu, wapi Nge ke kwenda?’ Yandi tubaka, ‘Mu ke yutuka soma na kukomama diaka na kulunsi.’” Yandi tubaka, “Mu me kwisa yutuka.”

²²⁴ Kaka na manima bawu tubaka, “Nani kele na nkumbu ya Simon Pierre?”

Yandi tubaka, “Munu yandi yayi!”

Yandi tubaka “Beto me kubama samu na nge.”

Yandi tubaka “Mu vwandaka vingila beno.” Yandi basikaka na nganda.

²²⁵ Mwana-bakala yina simbaka yandi na dipeka, mpe yandi tubaka, “Vingila fioti, Simon; mu me ndima ti yina kele diaka Nzambi! Mpe ntangu yayi mu ke na boma ve; bika ti ya munu kuvwanda yina ke landa.” Ya kieleka. Aleluya!

Landila . . . Ya me pola na menga, yinga, ya me pola na menga,

Nsangu yayi ya mbote ya Mpeve-Santu me pola na menga,
menga ya bilandi yina kufwaka samu na Kieleka,
Nsangu yayi ya mbote ya Mpeve-Santu ke landila na kupola na menga.

Muntu ya ntete kufwaka samu na manaka yayi ya Mpeve-Santu,

Vwandaka Jean Baptiste, kasi yandi kufwaka mutindu muntu;

Na manima kwisaka Mfumu Yesu, ba komaka Yandi na kulunsi,

Yandi longaka ti Mpeve lendaka vulusa bantu na disumu.

Ya ke na Pierre na Paul, na Jean le divin,
Bawu pesaka baluzingu ya bawu samu Nsangu yayi ya mbote kusema;

Ba vukisaka menga ya bawu, mutindu baprofete ya ntama,

Samu Ndinga ya Nzambi ya kieleka kuzabisama na bukieleka.

Ya ke na mioyo na nsi ya diziku, ke na kuboka, “Yinki ntangu?”

Mfumu ke pesa ndola na bayina salaka yimbi;
(Beno kuwa!)

Kasi ya ke vwanda na mingi yina ke pesa baluzingu ya bawu

Samu na Nsangu yayi ya mbote ya Mpeve-Santu na cramoisi ya yawu.

Ya me pola na menga, yinga, ya me pola na menga,

Nsangu yayi ya mbote ya Mpeve-Santu me pola . . . menga,

Menga ya bilandi yina kufwaka samu na Kieleka,

Nsangu yayi ya mbote ya Mpeve-Santu me pola
na menga.

²²⁶ Beto Disonuku mosi na ntwala beto kwenda:

... *Mpe bawu tubaka na Pierre mpe... bayankaka ya bawu, Bakala mpe bampangi, yinki beto lenda sala samu na beto vuluka?*

... *Pierre tubaka na bawu, Beno balula bantima, beno nionso mpe beno baka mbotika na Nkumbu ya Yesu Klisto samu na mulemvo ya disumu ya beno, mpe beno ke kuzwa dikabu ya Mpeve-Santu.*

Samu nsilulu ke samu na beno, mpe bana ya beno, mpe bayina nionso ke ntama, ya mingi Mfumu Nzambi ya beto ke bokila.

²²⁷ Mfumu kusakumuna beno ntangu yayi. Na ntangu beto ke basika. Beno landila mbotika mutindu beto...?... 

60-0522M Lukumu Ya Bana #3
Branham Tabernacle
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org